

摘藻堂四庫全書薈要

史部

欽定四庫全書薈要卷六千三百九十一史部

元史卷十二

明翰林學士亞中大夫知制誥兼修國史宋濂等修

本紀第十二

世祖九

十九年春正月壬戌朔高麗國王王暎遣其大將軍金子廷來賀丙寅罷征東行中書省丁卯諸王扎拉呼至自軍中時皇子北安王以軍鎮阿里瑪圖之地以禦海

都諸王錫里濟與托克托穆爾扎木和拉色埒默等謀

劫皇子北安王以叛欲與扎拉呼結援海都海都不從

色埒默悔過執錫里濟等北安王遣扎拉呼以聞妖民

張圓光伏誅立太僕院撥信州民四百八戶隸諸王拜

穆爾丙子車駕畋于近郊丁丑高麗國王貢紬布四百

匹丙戌賜西平王集賽諾海等鈔一萬一千五百二十

一錠二月辛卯朔車駕幸柳林饒州總管姚文龍言江

南財賦歲可辦鈔五十萬錠詔以姚龍為江西道宣慰

使兼措置茶法命司徒阿爾尼格行工部尚書諾海製
飾銅輪儀表刻漏改給駙馬昌吉印修宮城太廟司天
臺癸巳調軍一萬五千馬五千匹征也可不薛遣使代
祀嶽瀆后土甲午甘州逃軍二千二百人自陳願孛家
四千九百四十口還戍敕以鈔一萬六百二十錠布四
千九百四十匹驢四千九百四十頭給之議征緬國以
台布為右丞伊克德濟為叅政領兵以行戍戍給巴實
伯里元帥綦公直軍需遣使往乾山造江南戰船千艘

庚子賜諸王塔喇海籍沒五十戶願受十二戶博爾歡
理算未徵糧二十七萬石詔徵之壬寅陞軍器監秩三
品命軍官陣亡者其子襲職以疾卒者授官降一等具
為令授溪洞招討使郭昂等九人虎符仍賞張溫顏義
顯銀各千兩收鴻和爾托輝民匠九百五十三戶入官
乙巳立廣東按察司戊申車駕還宮己酉減省部官冗
員改上都宣課提領為宣課提舉司立鐵冶總管府罷
提舉司減大都稅課官十四員為十員改羅羅斯宣慰

司隸雲南省徙浙東宣慰司於溫州分軍戍守江南自
歸州以及江陰至三海口凡二十八所庚戌以叅知政
事唐古特等六人鎮守黃州建康江陵池州興國壬子
詔僉亦奚不薛及播思敘三州軍征緬國癸丑大良平
元帥蒲元圭遣其男世能入覲甲寅車駕幸上都申嚴
漢人軍器之禁丁巳安州張勑驢以詐敕及偽為丞相
博囉署印伏誅戊午賜雲南使臣及陝西簽省已拜以
下銀鈔衣服籍福建戶數三月辛酉朔烏蒙民叛敕諾

海哈喇蘇默率蒙古漢人新附軍討之賞呼圖克岱爾
等戰功牛羊馬益都千戶王著以阿哈瑪特蠹國害民
與高和尚合謀殺之壬午誅王著張易高和尚于市皆
醢之餘黨悉伏誅甲申德濟特哩以已貲充屯田之費
諸王阿濟格以聞敕酬其直丙戌禁益都東平沿淮諸
郡軍民官捕獵戊子立塔爾巴噶驛以烏蒙阿穆崧所
輸驟馬給之以領北庭都護阿必實克為御史大夫行
御史臺事夏四月辛卯敕和爾果斯集中書省部御史

臺樞密院翰林院等官議阿哈瑪特所管財賦先封籍
府庫丁酉以和爾果斯為中書右丞相降右丞相昂吉
爾岱為留守仍同僉樞密院事戊戌征蠻元帥諤勒哲
圖等平陳弔眼巢穴班師賞其軍鈔令還家休息遣揚
州射士戍泉州陳弔眼父文桂及兄弟桂龍滿安納欵
令護送赴京師其黨吳滿張飛迎敵就誅之敕以大都
巡軍隸留守司壬寅立回易庫中書左丞耿仁等言諸
王公主分地所設達魯噶齊例不遷調百姓苦之依常

調任滿從本位下選代為宜從之以留守司兼行工部
敕自今歲用官車勿賦於民可即灤河造之給其糧費
甲辰以甘州中興屯田兵逃還太原誅拒命者四人而
賞不逃者乙巳以阿哈瑪特家奴呼圖克岱爾等久總
兵權令布敦等代之仍隸大都留守司弛西山薪炭禁
以阿哈瑪特之子江淮行中書省平章政事呼遜罪重
於父勘之考覈諸處平準庫汰倉庫官御史臺臣言見
在贓罰鈔三萬錠金銀珠玉幣帛稱是詔留以給貧乏

者丙午收諸王拜特穆爾總軍銀印敕伊嚕勒昆依僧
例給糧戊申寧國路太平縣饑民採竹實為糧活者三
百餘戶敕出使人還不即以所給符上與上而有司不
即收者皆罪之凡文書並奏可始用御寶己酉刊行蒙
古輝和爾字所書通鑑以和爾果斯為右丞相詔天下
庚戌行御史臺言阿爾哈雅占降民為奴而以為征討
所得有旨降民還之有司征討所得籍其數量賜臣下
有功者以興兵問罪海外天下供給繁重詔慰諭軍民

應有逋欠錢糧及官吏侵盜並權停罷設懷孟路管河渠使副各一員拘拏江南官豪隱匿逃軍壬子罷江南諸司自給驛券丙辰敕以妻女姊妹獻阿哈瑪特得仕者黜之覈阿哈瑪特占據民田還其主庇富強戶輸賦其家者仍輸官北京宣慰使阿喇卜丹濫舉非才為管民官命選官代之議設鹽使司賣鹽引法擇利民者行之仍令按察司磨刷運司文卷定民間貸錢取息之法以三分為率定內外官以三年為考滿任者遷敘未滿

者不許超遷禁吐蕃僧給驛太繁擾害於民自今非奉
旨勿給給控鶴人鈔一萬五錠及其官更有差五月已
未朔鈎考萬億庫及南京宣慰司汰省部官阿哈瑪特
黨人七百十四人已革者百三十三人餘五百八十一
人並黜之瀘州管軍總管李從坐受軍士賄縱其私還
致萬戶卓諾等為賊所殺伏誅籍阿哈瑪特馬駝牛羊
驢等三千七百五十八追治阿哈瑪特罪剖棺戮尸通
玄門外罷南京宣慰司及江南財賦總管府丁卯降各

省給驛璽書戊辰併江西福建行省去江南冗濫官免
福建山縣鎮店宣課禁當路私人權府州司縣官招諭
畬洞人免其罪禁差戍軍防送禁人匠提舉擅招匠戶
已已遣浙西道宣慰司同知劉宣等理算各鹽運司及
財賦府茶場都轉運司出納之數籍阿哈瑪特妻子親
屬所營資產其奴婢縱為民罷宣慰使所帶相銜壬申
鎖繫耿仁至大都命中書省鞫之庚辰議於平灤州造
船發軍民合九千人令特默齊巴延岱領之伐木於山

及取於寺觀墳墓官酬其直仍命僧格遣人督之癸未
給大都巴圖爾正軍夏衣和爾果斯言省部濫官七百
十四員其無過者五百八十一員姑存之沿海左副都
元帥石國英請以稅戶贍軍軍逃死者令其補足站戶
苗稅貧富不均者宜均其役又請行鹽法汰官吏罷捕
戶詔中書集議行之張惠阿里罷以甘肅行省左丞敏
珠爾丹為中書右丞行御史臺御史中丞張雄飛叅知
政事乙酉元帥秦公直請黥逃軍仍使從軍及設立治

場於巴實伯里鼓鑄農器從之丙戌巴實伯里城東三百餘里蝗害麥六月己丑朔日有食之芝生眉州甲午阿哈瑪特濫設官府二百四所詔存三十三餘皆罷又江南宣慰司十五道內四道已立行中書省罷之乙未發六盤山屯田軍七百七十人以補劉恩之軍敕宣慰司等官毋役官軍丙申發射士百人衛丞相他人不得援例戊戌以占城既服復叛發淮浙福建湖廣軍五千海船百艘戰船二百五十命索多為將討之亡宋軍有

手號及無手號者並聽為民己亥命何子志為管軍萬戶使暹國辛丑籍阿哈瑪特妻子壻奴婢財產癸卯禁濫保軍功乙巳招無籍軍給衣糧己酉賞太子府宿衛軍禦盜功給鈔馬有差無妻者以沒官寡婦配之以阿哈瑪特居第賜和爾果斯士子敕中外百官立限決事癸丑從和爾果斯言罷司徒府及農政院鎖繫呼遜赴揚州鞠治丁巳征亦奚不薛盡平其地立三路達嚕噶齊留軍鎮守命雅爾哈總之以伊蘇低爾為都元帥宣

慰使秋七月戊午朔日有食之立行樞密院於揚州鄂
州庚申命行御史臺揀汰各道按察司官辛酉副郝禎
棺戮其尸壬戌命以官錢給戍軍費而以各鄂囉所征
還官禁諸位下營運錢貨差軍護送高麗國王請自造
船一百五十艘助征日本戊辰征鴨池回軍屯田安西
以鈔給之庚午令蒙古軍守江南者更番還家壬申發
察汗諾爾軍千人治晉山道立馬湖路總管府癸酉賜
高麗王王晷金印癸酉宣慰孟慶元萬戶孫勝夫使瓜

哇回為孟古岱所囚詔釋之丁丑罷汪扎拉台總帥收
其制命虎符以鞏昌路達魯噶齊布色特穆爾為鞏昌
平涼等處二十四處軍前便宜都總帥府達魯噶齊以
蒙古人博囉領湖北辰沅等州淘金事戊寅議築阿實
達必實古皇城樞密院言用木十二萬地遠難致依察
汗諾爾築土為牆便從之乙酉詔賜諸王塔海特穆爾
呼圖克特穆爾等金幣有差闕婆國貢金佛塔發米賑
奇爾齊蘇貧民八月丁亥朔給乾山造船軍匠冬衣及

新附軍鈔庚寅孟古岱征羅氏鬼國還仍佩虎符為管

軍萬戶辛卯以阿巴齊督運糧癸巳發羅羅斯等軍助

征緬國辛亥併溜菜路田索二鎮仍於驛臺立新城縣

治大駕駐蹕龍虎臺江南水民饑者衆真定以南旱民

多流移和爾果斯請所在官司發廩以賑從之申嚴以

金飾車馬服御之禁又禁諸監官不得令人匠私造器

物甲寅聖誕節是日還宮乙卯御正殿受皇太子諸王

百官朝賀丙辰謫尼格塔納戊占城以贖罪九月丁巳

朔賑真定饑民其流移江南者官給糧使還鄉里敕中
書省窮治阿哈瑪特黨布色台請於諾爾布實哩庫立
驛從之以阿哈瑪特沒官田產充屯田籍阿里家戊午
誅阿哈瑪特第三子阿薩爾剝其皮以徇庚申汰冗官
游顯乞罷連海州屯田以事隸管民官從之以顯平章
政事行省揚州福建宣慰司獲倭國諜者有旨留之辛
酉誅耿仁蘇都爾丹及阿哈瑪特第四子實都招討使
楊庭璧招撫海外南番皆遣使來貢俱藍國主遣使奉

表進寶貨黑猿一那旺國主忙昂以其國無識字者遣使四人不奉表蘇木都速國主土漢八的亦遣使二人蘇木達國相臣那里八合刺攤赤因事在俱藍國聞詔代其主打古兒遣使奉表進指環印花綺段及錦衾二十合寓俱藍國伊嚕勒昆主鄂特色爾丕勒瑪亦遣使奉表進七寶項牌一藥物二瓶又管領穆蘇愛滿瑪哈穆特亦遣使奉表同日起闕壬戌禁諸人不得沮撓課程教官吏受賄及倉庫官侵盜臺察官知而不糾者驗

輕重罪之中外官吏贓罪輕者杖決重者處死言官緘
默與受贓者同罪仍詔諭天下乙丑簽亦奚不薛等處
軍丁卯安南國進貢犀兕金銀器香藥等物增給元帥
綦公直軍冬衣鈔已巳命軍站戶出錢助民和顧和買
籍雲南新附戶自烏蘭哈達鎮雲南凡八籍民戶四籍
民田民以為病至是令已籍者勿動新附者籍之定雲
南稅賦用金為則以貝子折納每金一錢直貝子二十
索罷雲南宣慰司壬申敕平灤高麗耽羅及揚州隆興

泉州共造大小船三千艘亦奚不薛之北蠻洞向世雄
兄弟及散毛諸洞叛命四川行省就遣亦奚不薛軍前
往招撫之使與其主偕來癸酉誅阿哈瑪特姪宰努鼎
罷呼遜黨馬璘江淮行省參知政事乙亥遣使括雲南
所產金以博囉為打金洞達嚕噶齊戊寅給新附軍賈
祐衣糧祐言為日本國焦元帥壻知江南造船遣其來
候動靜軍馬壓境願先降附辛巳敕各行省止用印一
餘者拘之及拘諸位下印發鈔三萬錠於隆興德興府

宣德州和糴糧九萬石壬午賜諸王阿濟格金五千兩
銀五萬兩釐正選法置黑簿以籍阿哈瑪特黨人名令
諸路歲貢儒吏各一人各道提刑按察司舉廉能者陞
等遷敘冬十月丁亥朔增兩浙鹽價詔整治鈔法已丑
敕河西僧道伊嚕勒昆有妻室者同民納稅庚寅以歲
事不登聽諸軍捕獵於汴梁之南辛卯以平章軍國重
事監修國史耶律鑄為中書左丞相壬辰享于太廟罷
西京宣慰司丙申立詹事院以諤勒哲為右詹事賽音

為左詹事由大都至中灤中灤至瓜州設南北兩漕運
司立蘆臺越支三义沽鹽使司河間滄清山東濱樂安
及膠萊莒密鹽使司五敕籍沒財物精好者及金銀幣
帛入內帑餘付刑部以待給賜禁中出納分三庫御用
寶玉遠方珍異隸內藏金銀濟遜衣段隸右藏常課衣
段綺羅縑布隸左藏設官吏掌鑰者三十二人仍以宦
者二十二入董其事減太府監官癸卯命崔彧等鈎考
樞密院文卷甲辰占城國納款使回賜以衣服乙巳遣

阿達招降法里郎阿魯乾伯等國罷屯田總管府以其
事隸樞密院令管軍萬戶兼之丙午以汪惟孝為總帥
丁未女直陸實自請造船運糧赴鬼國贍軍從之議征
乂巴洞庚戌以四川民僅十二萬戶所設官府二百五
十餘令四川行省議減之移成都宣慰司於碯門罷利
州及順慶府宣慰司禁大都及山北州郡酒詔兩廣福
建五品以下官從行省就便銓注耶律鑄言有司官吏
以采室女乘時害民如今大郡歲取三人小郡二人擇

其可者厚賜其父母否則遣還為宜從之籍京畿隱漏
田履畝收稅命游顯專領江浙行省漕運乙卯命堅通
專掌奏記誅阿哈瑪特長子呼遜第二子瑪蘇庫子揚
州醢之十一月戊午上都建利用庫賜太常禮樂籍田
等二百六十戶鈔千二百錠甲子給謙州屯田軍衣服
丁卯給和琳戍還軍校銀鈔幣帛江南襲封衍聖公孔
洙入覲以為國子祭酒兼提舉浙東道學校事就給俸
祿與護持林廟璽書詔以阿哈瑪特罪頒告中外凡民

間利病即與興除之壬申以勢家為商賈者阻遏官民
船立沿河巡禁軍犯者沒其家癸酉分元帥恭公直軍
戍察遜甲戌中書省臣言天下重囚除謀反大逆殺祖
父母父母妻殺夫奴殺主因姦殺夫並正典刑外餘犯
死罪者令充日本占城緬國軍從之改鑄省印丙子四
川行省招諭大盤洞主向臭友等來朝戊寅耶律鑄言
前奉詔殺人者死仍徵燒埋銀伍十兩後止徵鈔二錠
其事太輕臣等議依蒙古人例犯者沒一女入仇家無

女者徵鈔四錠從之以袁州饒州興國軍復隸隆興省
馬八兒國遣使以金葉書及土物來貢罷都功德使圖
烈其修設佛事妄費官物皆徵還之賜貧乏者哈喇塔
爾巴噶等羊馬鈔十二月丁亥命阿勒哈領范文虎等
所有海船三百艘壬辰中書左丞張文謙為樞密副使
乙未中書省臣言平原郡公趙與芮瀛國公趙昱翰林
直學士趙與愚宜並居上都帝曰與芮老矣當留大都
餘如所言繼有旨給瀛國公衣糧發遣之唯與愚勿行

以中山薛保任上匿名書告變殺宋丞相文天祥癸卯
御史中丞崔或言臺臣於國家政事得失生民休戚百
官邪正雖王公將相亦宜糾察近唯御史有言臣以為
臺官皆當建言庶於國家有補選用臺察官若由中書
必有偏徇之弊御史宜從本臺選擇初用漢人十六員
今用蒙古人十六員相參巡歷為宜從之浚濟川河降
拱衛司復正四品仍收其虎符罷湖廣行省金銀鐵冶
提舉司以其事隸各路總管府以建康淘金總管府隸

建康路中書右丞扎薩克為平章政事罷解鹽司及諸
鹽司令運司官親行調度鹽引罷南京屯田總管府以
事隸南陽府阿爾哈雅復鎮遠軍發軍千人戍守以其
地與西川行省接就以隸焉詔立帝師達爾瑪巴拉喇
吉塔掌玉印統領諸國釋教造帝師帕克斯巴舍利塔
免鞏昌等處積年所欠田租稅課賜皇子北安王位下
塔齊爾等馬牛羊各有差

二十年春正月丙辰朔高麗國王王晷遣其大將軍俞

洪慎來賀已未納皇后鴻吉哩氏辛酉賜諸王徹伯爾
印賞諸王必齊克特穆爾駙馬昌吉軍鈔敕諸王公主
駙馬得江南分地者於一萬戶田租中輸鈔百錠准中
原五戶絲數癸亥敕雅爾哈領軍征緬國乙丑高麗國
王王晷遣使烏拉岱貢氎布線紬等物四百段和爾果
斯言去冬中山府奸民薛保住上匿名書妄效東方朔
書欺罔朝廷希覬官賞敕誅之又言自今應訴事者必
須實書其事赴省臺陳告其敢以匿名書告事重者處

死輕者流遠方發其事者給犯人妻子仍以鈔賞之又
阿哈瑪特專政時衙門太冗虛費俸祿宜依劉秉忠許
衡所定併省為便皆從之設務農司敕諸事赴省臺訴
之理決不平者許詣登聞鼓院擊鼓以聞預備征日本
軍糧令高麗國備二十萬石以安塔哈依舊為征東行
中書省丞相丙寅發五衛軍二萬人征日本發鈔三千
錠糴糧于察汗諾爾以給軍匠以燕南河北山東諸郡
去歲旱稅糧之在民者權停勿徵仍諭自今管民官凡

有災傷過時不申及按察司不即行視者皆罪之刑部
尚書崔彥言時政十八事詔中書省與御史大夫伊蘇
特穆爾議行之罷上都回易庫丁卯巴延岱等伐船材
于拉鄂特山乾山凡十四萬二千有奇起諸軍貼戶年
及丁者五千人民夫三千人運之己巳太陰犯軒轅御
女賜諸王伊爾根特訥克諾木齊金各五十兩金衣襖
一庚午以平灤造船去運木所遠民疲於役徙於陽河
造之壬申御史臺言燕南山東河北去年旱災按察司

已嘗閱視而中書不為奏免民何以堪請權停稅糧制
曰可移鞏昌按察司治甘州命右丞實喇特穆爾及萬
戶三十五人蒙古軍習舟師者二千人特默齊萬人習
水戰者五百人征日本丁丑以招討楊廷璧為宣慰使
賜弓矢鞍勒使諭俱藍等國己卯命諸軍習戰械給鈔
八千錠於隆興宣德等處和羅以贍之庚辰太陰入南
斗壬午車駕畋于近郊以四川歸附官楊文安為荆南
道宣慰使改廣東提刑按察司為海北廣東道廣西按

察司為廣西海北道福建按察司為福建閩海道鞏昌
按察司為河西隴北道癸未撥呼蘭及塔爾巴噶等四
千戶隸皇太子位下壬戌敕於圖烈圖等富戶內貸牛
六百頭給奇勒噶蘇之貧乏者二月戊子定兩廣四川
戍軍二三年一更廩其家屬軍官給俸以贍之賜俱藍
國王瓦你金符賜駙馬阿爾圖江南民千戶以春秋仲
月上戊日祭社稷及武成王庚寅太陰掩昴癸巳敕鄂
拓克錢仍其舊丁酉給巴實伯里屯田軍戰襖庚子敕

權貴所占田土量給各戶之外餘悉與集賽台等耕之
減四川官府併西川東西北三道宣慰司及潼川等處
鎮守萬戶府新軍總管府威灌茂等州安撫司十四處
是夜太白犯昴辛丑定軍官選格立官吏贓罪法壬寅
太白犯昴乙巳令隆興行省遣軍護送占城糧船太陰
犯心丁未定安洞酋遣兄弟入覲敕給驛馬己酉陞拉
木伊克監秩正五品癸丑諭中書省大事奏聞小事便
宜行之毋致稽緩甲寅降太醫院為尚醫監改給銅印

立江南等處官醫提舉司賜日本軍官布古岱及軍士
銀鈔有差遣官錄揚州囚徒三月丁巳諸王星納噶爾
設王府官三員以萬戶布都瑪勒鎮守金齒罷女直造
日本出征船罷河西行御史臺立鞏昌等處行工部罷
福建市舶總管府存提舉司併泉州行省入福建行省
免福建歸附後未徵苗稅以庫庫尼敦治江淮行省或
言其過命烏訥格台巴延佐之戊午以新附洞蠻酋長
為千戶己未歲星犯鍵閉罷京兆行省立行工部御史

臺臣言平濤造船五臺山造寺伐木及南城建新寺凡役四萬人乞罷之詔伐木建寺即罷之造船一事其與省臣議前後衛軍自願征日本者命選留五衛漢軍千餘其新附軍令悉行庚申太陰犯井辛酉賞諸王赫伯弟孟古岱所部軍士戰功銀鈔幣帛衣服各有差給甘肅戍軍鈔壬戌太陰犯鬼乙丑命烏訥格台往揚州錄囚遣江北重囚謫征日本立雲南按察司照刷行省文卷罷淮安等處淘金官惟計戶取金以阿哈瑪特綿絹

絲線給貧民工匠給王傳諤尼庫特齊印給西川福建
兩廣之任官驛馬以湖南宣慰使張鼎新行省叅知政
事樊楫等嘗阿附阿爾哈雅救罷之丙寅車駕幸上都
江西行省叅政完顏諾海坐越例驟陞及妄舉一百九
十八人入官罷之罷河西辦課提舉司丁卯增置蒙古
監察御史六員己巳歲星犯房於酉歲星掩房廣州新
會縣林桂芳趙良鈐等聚衆偽號羅平國稱延康年號
官軍擒之伏誅餘黨悉平乙亥罷諸處役夫遣安塔哈

戊察遜和塔拉默色帥甘州新附軍往鄂端己卯給各
衛軍出征馬價鈔辛巳立輝和爾四處驛及交鈔庫壬
午祀太一罷福建道宣慰司復立行中書省于漳州以
中書右丞張惠為平章政事御史中丞額森特穆爾為
中書左丞並行中書省事賜穆爾扎木哈卜齊勒鈔賑
博囉集賽巴喇噶齊等貧乏賜皇子北安王所部馬牛
羊有差夏四月丙戌立巴實伯里和州等處宣慰司庚
寅敕雅爾哈戍守亦奚不薛都元帥伊蘇岱爾還自亦

奚不薛駐軍成都求入見許之仍遣人屯守險隘以侍
衛親軍二萬人助征日本辛卯樞密院臣言蒙古侍衛
軍於新城等處屯田砂礫不可種乞改撥良田從之壬
辰安塔哈求軍官習舟楫者同征日本命元帥張林招
討張瑄總管朱清等行以高麗王就領行省規畫日本
事宜甲午減江南諸道醫學提舉司四省各存其一免
京畿所括豪勢田舊稅三之二新稅三之一高麗國王
王暭請以蒙古人同行省事禁近侍為人求官紊亂選

法申嚴酒禁有私造者財產女子沒官犯人配役申私

鹽之禁許按察司糾察鹽司己亥太陰犯房壬寅太陰

犯南斗癸卯授高麗國王王曙征東行中書省左丞相

仍駙馬高麗國王乙巳命樞密院集軍官議征日本事

宜程鵬飛請明賞罰有功者軍前給憑驗候班師日改

授從之庚戌右丞伊蘇岱爾招撫筠連州定州阿永都

掌等處蠻獨山都掌蠻不降進軍討之生擒酋長得蘭

紐遂班師發大都所造回回砲及其匠張林等付征東

行省辛亥以征日本給後衛軍衣甲及大名衛輝新附軍鈔敏珠爾丹等檢覈萬億庫以罪繫者多請付蒙古人治有旨蒙古人為利所汨亦異往日矣其擇可任者使之五月乙卯給甘州戍軍夏衣戊午丞相巴延諸王桑阿克達爾等言征緬軍宜叅用蒙古新附軍從之已未免五衛軍征日本發萬人赴上都縱平濠造船軍歸耕撥大都見管軍代役庚申減隆興府昌州哈里泊管鹽官吏九十九人以其事隸隆興府定江南民官及轉

運司官公田甲子徙揚州淘金夫赴益都立征東行中

書省以高麗國王與安塔哈共事給高麗國征日本軍衣甲御史中丞崔彥言江南盜賊相繼而起皆緣拘水手造海船民不聊生日本之役宜姑止之江南四省應辦軍需宜量民力勿強以土產所無凡給物價及民者必以實召募水手當從所欲伺民之氣稍蘇我之力粗備三二年復東征未晚不從丙寅太陰掩心東星免江南稅糧三之二敕阿爾哈雅調漢軍七千新附軍八千

以付索多從征辛未占城行省已破占城其國主補底
遁去降璽書招徠之甲戌發征日本重囚往占城緬國
等處從征設高麗國勸農官四員丙子詔諭諸王桑阿
克達爾先是雲南重囚令便宜處決恐濫及無辜自今
凡大辟仍須待報併省江淮雲南州郡以耶律埒克為
中書叅知政事免戍軍差稅禁諸王鄂囉官科擾軍戶
以西南蠻夷有謀叛未附者免西川征緬軍令專守禦
支錢令各驛供給戊寅諸陳言者從都省集議可行者

以聞不可則明以諭言者許按察司官用弓矢監察御

史阿嘯罕坐擅免贓錢不糾私釀等罪罷用御史中丞

崔彥言罷各路選取室女頒行宋文思院小口斛敕以

陝西按察司贓罰錢輸於秦王省北京提刑按察司副

使僉事各一員立海西遼東提刑按察司治女直碩達

勒達部已卯酬諸王哲伯特穆爾給軍羊馬鈔十萬錠

海南四州宣慰使朱國寶請益兵討占城國主詔以阿

爾哈雅軍萬五千應之用王積翁言詔江南運糧於阿

巴齊新開神山河及海道兩道運之立鄂拓克總管府
辛巳給占城行省索多弓矢甲仗六月丙戌申嚴私易
金銀之禁以甘州行省叅政王倚為中書叅知政事免
大都及平灤路今歲絲料江南遷轉官不之任者杖之
追奪所受宣勅戊子以征日本民間騷動盜賊竊發呼
圖克特穆爾孟古岱乞益兵禦寇詔以興國江州軍付
之己丑增官吏俸給庚寅定市舶抽分例舶貨精者取
十之一粗者十五差五衛軍修築行殿外垣命諸王呼

雅克圖設斷事官丙申發軍修完大都城辛丑發軍修築隄堰戊申用巴延等言所括宋手號軍八萬三千六百人立牌甲設官以統之仍給衣糧庚戌流叛賊陳弔眼叔陳桂龍於噶達蘇之地辛亥四川行省叅政竒爾濟蘇等討平九溪十八洞以其酋長赴闕定其地立州縣聽順元路宣慰司節制以向世雄等為义巴諸洞安撫大使及安撫使秋七月癸丑朔蠲建寧路至元十七年前未納苗稅丙辰免徵古桂軍賦諭安塔哈所造征

日本船少緩之所拘商船其悉給還阿里沙坐虛言惑
衆誅太白犯井丁巳賜尼古爾岱等珠衣庚申調軍益
戍雲南丙寅立亦奚不薛宣慰司益兵戍守開雲南驛
路分亦奚不薛地為三設官撫治之癸亥太陰犯南斗
乙丑太白犯井丁卯罷淮南淘金司以其戶還民籍庚
午熒惑犯司怪新附官周文英入見其勢禮銀萬兩金
四十錠特穆爾布哈匿為已有詔即其家搜閱沒入官
敕捕阿哈瑪特婦翁尚書蔡仲英徵償所貸官鈔二十

萬錠阿巴齊姚演以開神山橋渠侵用官鈔二十四百錠折閱糧米七十三萬石詔徵償仍議其罪壬申亦奚不薛軍民千戶宋添富及順元路軍民總管兼宣撫司阿里等來降班師以羅鬼酋長阿利及其從者八覲立亦奚不薛總管府命阿里為總管丙子減江南十道宣慰司官一百四十員為九十三員敕上都商稅六十分取一免大都平灤兩路今歲俸鈔立總教院秩正三品丁丑命按察司照刷土番宣慰司文卷立鋪軍捕淮西

盜賊淮東宣慰同知宋廷秀私役軍四十人杖罷之庚辰給呼圖克特穆爾等軍貧乏償奇爾哈斯等羊馬價鈔八月癸未以密拉齊平章軍國重事商議公事立懷來淘金所甲午敕大名真定北京衛輝四路屯駐新附軍於東京屯田安南國遣使以方物入貢丙午太白犯軒轅丁未歲星犯鈞鈴浙西道宣慰使史弼言頃以征日本船五百艘科諸民間民病之宜取阿巴齊所有船修理以付安塔哈庶寬民力并給鈔於沿海募水手從

之濟州新開河成立都漕運司庚戌賞還役宿衛軍賜皇子北安王所部軍鈔羊馬九月壬子太白犯軒轅少女戊午哈喇岱等招降象山縣海賊尤宗祖等九千五百九十二人海道以寧太陰犯斗壬戌調黎兵同征日本丙寅古荅奴國因商人阿爾威等來言自願効順併占城荆湖行省為一徙舊城市肆局院稅務皆入大都減稅徵四十分之一賞朱雲龍漕運功授七品總押仍以幣帛給之己巳太白犯右執法辛未以歲登開諸路

酒禁廣東盜起遣兵萬人討之壬申太陰掩井癸酉熒惑犯鬼甲戌太陰犯鬼熒惑犯積尸氣太白犯左執法戊寅史弼陳弭盜之策為首及同謀者死餘屯田淮上帝然其言詔以其事付弼賊黨耕種內地其妻奴送京師給鴈坊人等冬十月庚寅給征日本新附軍鈔三萬錠壬辰車駕由古北口路至上都癸巳鄧端宣慰使劉恩進嘉禾同穎九穗七穗六穗者各一甲午以平章政事扎薩克為樞密副使詔五衛軍歲以十月聽十之

五還家備資裝正月番上代其半還四月畢入役時各
衛議先遣七人而以三人自代從之乙未享于太廟丙
申太陰犯昴丁酉誅占城逃回軍孟古代請增蒙古漢
軍戍邊從之以呼圖克總揚州行省索多新益軍庚子
許阿實達軍以兄弟代役建寧路管軍總管黃華叛衆
幾十萬號頭陀軍偽稱宋祥興五年犯崇安浦城等縣
圍建寧府詔布琳濟達史弼等將兵二萬二千人討平
之耶律鑄罷壬寅立東阿至御河水陸驛以便遞運徙

濟州潭口驛於新河魯橋鎮給甘州納硫黃貧乏戶鈔
癸卯諸王哲伯特穆爾請括開常德府分地民戶不許
中書省臣言阿巴齊新開河二處皆有倉宜造小船分
海運從之中書省臣言雅伊密實嘗請諭江南諸郡募
人種淮南田今乃往各郡轉收民戶行省官庫庫尼敦
言其非便宜令於治所召募不可強民從之戊申給碩
達勒達鯨寡孤獨者絹千匹鈔三百錠立和琳平準庫
遣官檢覈益都淘金欺弊罷中興管課提舉司及北京

鹽鐵課程提舉司已酉簽河西質子軍年及丁者充軍

庚戌各道提刑按察司增設判官二員十一月壬子賞

大布哈托歡等戰功銀幣癸丑總管陳義願自備海船

三十艘以備征進詔授義萬戶佩虎符義初名五虎起

自海盜內附後其兄為招討義為總管敕凡盜賊必由

管民官鞫問仍不許私和丁巳命各省印授時歷諸王

哲伯特穆爾請於分地二十四城自設管課官不從又

請立拘擁課稅所其長從都省所定次則王府差設從

之詔大都田土並令輸稅甘州新括田土畝輸租三升
己未吏部尚書劉好禮以奇爾濟蘇風俗事宜來上壬
戌復立南京宣慰司乙丑罷開城路屯田總管府入開
城路隸京兆宣慰司戊辰立司農司掌官田邸舍人民
給諸王所部薩哈勒鄂蘭等羊馬以賑其乏河西官府
參用漢人徙甘肅沙州民戶復業大都城門設門尉丁
且禁雲南管課官於常額外多取餘錢戊寅禁雲南權
勢多取債息仍禁沒人口為奴及黥其面者太白歲星

相犯己卯從諸王珠卜孟古代等請賞烏特格等銀鈔
以旌戰功賜皇太子鈔千錠以御史臺贓罰鈔賜齊哩
克昆十二月庚辰賜諸王呼圖克特穆爾衣物呼都拉
所部軍銀鈔幣帛甲申賜布色台所部軍衣帛七千馬
二千賞西番軍官阿納巴斯等戰功辛卯以察呼所管
軍六千人備征日本壬辰給諸王阿濟格牛價以中書
叅議溫特赫圖塔哈廉貧不阿附權勢賜鈔百錠罷女
直出產金銀禁甲午給鈔四萬錠和糴于上都給司閤

衛士貧者人鈔二十錠辛丑賜諸王實勒們等銀以海道運糧招討使朱清為中萬戶賜虎符張瑄子文虎為千戶賜金符徙新附官仕內郡以蘇州還隸真定府路癸卯發粟賑碩達勒達四十九站甲辰太陰掩熒惑丙午罷雲南造賣金箔規措所罷雲南都元帥府及重設官吏定質子令凡大官子弟遣赴京師戊申雲南施州子童興兵為亂敕叅知政事阿哈巴克實帥兵合羅羅斯脫兒世合討之給布萬匹賑女直饑民一千戶是歲

斷死罪二百七十八人

元史卷十二

元史本紀卷十二考證

至元十九年七月癸酉賜高麗王王璿金印癸酉宣慰
孟慶元使瓜哇回 案七月戊午朔至癸酉為十六
日此下非癸未即乙酉不應復書癸酉但以下文丁
丑戊寅日推之則自癸至丁中間惟甲乙丙三日其
非癸未乙酉之誤可知二字當係衍文

九月辛酉招討使楊庭璧招撫海外南番 案庭璧原
本作廷堅考續綱目續通鑑俱作庭璧馬八兒等國

列傳亦同今據改

九月乙亥遣使括雲南所產金壬午賜諸王阿濟格金
五千兩銀五萬兩 案原本乙亥作丁亥壬午作壬
申九月為丁巳朔至乙亥為十九日三十日方為丁
亥壬午為二十六日壬申則十六日矣乙亥之下史
文明敘戊寅辛巳等日則實係訛誤而非顛倒也今
改

十月甲辰占城國納款 案占城列傳至元十九年十

月議征占城至二十一年始奉表歸款與此異

十一月甲子給謙州屯田軍衣服丁卯給和林戍還軍
校銀鈔幣帛 案謙州原文訛欠州地理志無欠州
之名當以音同而誤和林原本訛河林今改

十一月戊寅馬八兒國遣使來貢 按馬八兒傳作二
十年與此異

十二月壬辰張文謙為樞密副使 按壬辰原刻作壬
寅十二月自丁亥至乙未癸卯中間不應有壬寅今

據前後干支改

三月己巳歲星犯房 按原本誤乙巳今據前後干支

改

五月丙寅調漢軍新附軍付索多從征 按原本付訛

附今據文義改

十月庚寅給征日本新附軍鈔三萬錠 按新付下原

本脫軍字今據文義增

欽定四庫全書薈要卷六千三百九十二史部

元史卷十三

明翰林院學士亞中大夫知制誥兼修國史宋濂等修

本紀第十三

世祖十

二十一年春正月乙卯帝御大明殿右丞相和爾果斯率百官奉玉冊玉寶上尊號曰憲天述道仁文義武大光孝皇帝諸王百官朝賀如朔旦儀赦天下丁巳勅自

今凡奏事者必先語同列以所奏既奏其所奉旨云何
令同列知而後書之簿不明以告而輒書簿者杖筆且
齊己未罷雲南都元帥府所管軍民隸行省甲子罷揚
州等處理算官以其事付行省江浙行省平章孟古代
進真珠百斤丙寅庫庫尼敦言屯田芍陂兵二千布種
二千石得粳糯二萬五千石有奇乞增新附軍二千從
之丁卯建都王烏蒙及金齒一十二處俱降建都先為
緬所制欲降未能時諸王桑阿克達爾行省右丞台布

參知政事伊克德濟分道征緬於阿昔阿禾兩江造船
二百艘順流攻之拔江頭城令都元帥袁世安戍之遂
遣使招諭緬王不應建都太公城乃其巢穴遂水陸並
進攻太公城拔之故至是皆降庚午立江淮荆湖江西
四川行樞密院治建康鄂州撫州成都立耽羅國安撫
司辛未桑阿克達爾遣使進緬國所貢珍珠珊瑚異綵
七寶束帶甲戌遣蒙古官及翰林院官各一人祠嶽瀆
后土遣王積翁齎詔使日本賜錦衣玉環鞍轡積翁由

慶元航海至日本近境為舟人所害御史臺臣言罪黜
之人久忘其名又復奏用乞戒約帝曰卿等所言固是
然其間豈無罪輕可錄用者御史大夫伊蘇特穆爾對
曰以各人所犯罪狀明白敷奏用否當取聖裁從之丙
子建寧叛賊黃華自殺丁丑雲南諸路按察司官陸辭
詔諭之曰卿至彼當宣明朕意勿求貨財名成則貨財
隨之徇財則必失其名而性命亦不可保矣己卯馬八
兒國遣使貢珍珠異寶黹段二月辛巳以福建宣慰使

管如德為泉州行省參知政事征緬浚揚州漕河罷高麗造征日本船丁亥命翰林學士承旨色埒默祀先農于藉田壬辰以江西叛寇妻子賜鷹坊養虎者以布色台逃軍七百餘人付安西王屯田給以牛具邕州賓州民黃大成等叛梧州韶州衡州民相挺而起湖南宣州使色埒默將兵討之甲午罷羣牧所己亥瑞州獲叛民晏順等三十二人并妻孥送京師罷阿巴齊開河之役以其軍及水手各萬人運海道糧放檀州淘金五百人

還家丁未括江南樂工命安塔哈發兵萬五千人船二

百艘助征占城船不足命江西省益之戊申徙江淮行

省于杭州徙浙西宣慰司于平江省黃州宣慰司入淮

西道立法輪竿于大內萬壽山高百尺漳州盜起命江

浙行省調兵進討秦州總管劉發有罪嘗欲歸黃華事

覺伏誅遷故宋宗室及其大臣之仕者於內地三月辛

亥勅思播管軍民官自今勿遷丁巳皇子北安王諾木

罕至自北邊王以至元八年建幕庭于和琳北伊埒穆

爾之地留七年至是始歸右丞相安圖繼至以張弘範等將新附軍壬戌更定虎符丙寅乘輿幸上都丁卯太廟正殿成奉安神主甲戌置潮贛吉撫建昌戌兵乙亥高麗國王王晡以皇帝尊號禮成遣使來賀夏四月壬午令軍民同築堤堰以利五衛屯田乙酉省泉府司入戶部立大都留守司兼少府監立大都路總管府立西川延安鳳翔興元宣課司從密喇卜和卓瑪喇勒等言以鈔萬錠為市於巴實伯里及河西上都以哈扎爾齊

依舊揚州鹽運使歲市鹽八十萬石以贖過己亥涿州
巨馬河決衝突三十餘里庚子湖廣行省平章阿爾哈
雅請至海濱收占城散軍復使南征且趣未行者許之
壬寅江淮行省進各翼童男女百人呼圖克特穆爾征
緬之師為賊衝潰戊申高麗王王璿及公主以其世子
諫來朝勅發思播田楊二家軍二千從征緬籍江南鹽
徒軍藏匿者有罪和爾和等所部民戶告饑帝曰饑民
不救儲糧何為發萬石賑之命開元等路宣慰司造船

百艘付狗國戍軍雲南行省為破緬國江頭城進童男
女八十人并銀器幣帛五月己酉從托克托呼言立二
千戶總欽察喀喇子弟願為國宣勞者壬子拘征東省
印癸丑樞密院臣言索多潰軍已令李恒收集江淮江
西兩省潰軍別遣使招諭凡至者皆給糧舟楫損者修
之以俟阿爾哈雅調用從之戊午勅中書省奏目及文
冊不許用輝和爾字其宣命劄付並用蒙古書己未荆
湖占城行省言呼圖克烏瑪喇等將兵征占城前鋒舟

師至舒眉蓮港不知所向令萬戶劉君慶進軍次新州
獲占蠻始知我軍已還矣就遣占蠻向導至占城境其
國主遣阿不蘭以書降且言其國經索多軍馬虜掠國
計已空俟來歲遣嫡子以方物進繼遣其孫路司理勒
蟄等奉表詣闕乙丑取高麗所產鐵蠲江南今年田賦
十分之二其十八年以前逋欠未徵者盡免之阿嚕和
諾克言曩於江南民戶中撥匠戶三十萬無藝業者多
今已選定諸色工匠餘十九萬九百餘戶宜縱令為民

從之詔諭各道提刑按察司分司事宜庚午荆湖占城
行省以兵進據烏馬境地近安南請益兵命鄂州達魯
噶齊趙翥等奉璽書往諭安南河間任邱縣民李移住
謀叛事覺伏誅括天下私藏天文圖識太乙雷公式七
曜歷推背圖苗太監歷有私習及收匿者罪之丁丑呼
圖克烏瑪喇劉君慶等率揚州省軍二萬赴索多軍前
遇風船散其軍皆潰勅追烏瑪喇等誥命虎符及部將
所受宣勅以河西巴喇罕岱爾等代之仍聽阿爾哈雅

節制閏五月己卯封法喇王為郡王佩虎符改思播二
州隸順元路宣撫司罷西南番安撫司立總管府給西
川蒙古軍鈔使備鎧仗耕遂寧沿江曠土以食四頃以
下者免輸地稅命總帥汪惟正括四川民戶辛巳加封
衛輝路小清河神曰洪濟威惠王壬午蒙古侍衛親軍
都指揮使布古岱征黃華回進人口百七十一乙酉以
雲南境內洪城併察罕章隸皇太子丙戌行御史臺自
揚州遷于杭州庚寅賜歸附洞蠻官十八人衣遣還癸

已賜北安王螭紐金印罷皮貨所理算江南諸行省造
征日本船隱弊詔按察司毋得沮撓甲辰安南國王世
子陳日烜遣其中大夫陳謙甫貢玉杯金瓶珠條金領
及白猿綠鳩幣帛等物丙午以侍衛親軍萬人修大都
城六月壬子遣使分道尋訪測驗晷景日月交食厯法
增官吏俸以十分為率不及一錠者量增五分甲寅詔
封皇子托歡為鎮南王賜塗金銀印駐鄂州庚申改蒙
古都元帥府為蒙古都萬戶府砲手元帥府為砲手萬

戶府砲手都元帥府為回回砲手軍匠萬戶府甲子命
伊蘇岱爾部軍六十人淘金雙城從噶達蘇請移阿拉
克岱和琳屯田軍與其所部相合屯田五河乙丑中衛
屯田蝗甲戌賜皇子阿雅噶齊集賽台布展等及烏梁
海部民戶鈔二萬一千六百四十三錠皇子諾木罕集
賽台齊哩克昆一萬二百四十六錠以馬一萬一百九
十五羊一萬六十賜托多爾海扎拉爾所部貧軍秋七
月丁丑朔勅荆湖西川兩省合兵討乂巴散毛洞蠻雲

南省臣言騰越永昌羅必丹民心攜貳宜令伊蘇岱爾
或汪惟正將兵討之制曰可命樞密院差軍修大都城
己卯立衍福司中書省臣言宰相之名不宜輕授今占
城省臣已及七人宜汰之詔軍官勿帶相銜賜皇子北
安王印復揚州管匠提舉司丁亥江淮行省以占城所
遣太半達連扎赴闕及其地圖來上達喇齊言特訥克
國王出戍高麗調烏蘇等所部軍四百以往今特訥克
已回留軍耽羅去其妻子已久宜令他軍更戍巴延等

議以高麗軍千人屯耽羅其留戍四百人縱之還家從之戊子詔鎮南王托歡征占城遣所留安南使黎英等還其國日烜遣其中大夫阮道學等以方物來獻總帥汪惟正言一門兄弟從仕者衆乞仍於秦鞏州置便宜都總帥府仍用元帥印即其兄弟四人擇一人為總帥總帥之下總管府令其兼之汪氏二人西川典兵者亦擇其一為萬戶餘皆依例遷轉從之賜貧乏者鄂勒歡伊嚕音特穆爾等鈔七千四百八十錠八月丁未雲南

行省言華帖白水江鹽井三處土老蠻叛殺諸王及行
省使者調兵千人討之定擬軍官格例以河西回回輝
和爾等依各官品充萬戶府達魯噶齊同蒙古人女直
契丹同漢人若女直契丹生西北不通漢語者同蒙古
人女直生長漢地同漢人已酉御史臺臣言無籍之軍
願從軍殺掠者初假之以張渡江兵威今各持弓矢剽
劫平民若不分隸各翼恐生他變詔遣之還家辛亥征
東招討司尼古爾岱言有旨進討古威而阿爾哈雅多

羅岱雲丹三軍皆後期七月後海風方高糧仗船重深
虞不測姑宜少緩從之占城國王乞回索多軍願以土
產歲修職貢使太盤亞羅日加翳大巴南等十一人奉
表詣闕獻三象甲子放福建畚軍收其軍器其部長於
近處州郡民官遷轉庚午車駕至自上都甲戌綽鄂上
言建都女子沙智治道立站有功已授虎符管領其父
元收附民為萬戶今改建昌路總管仍佩虎符從之九
月甲申京師地震併市舶入鹽運司立福建等處鹽課

市舶都轉運司中書省言福建行省軍餉絕少必於揚
州轉輸事多遲誤若併兩省為一分命省臣治泉州為
便詔以中書右丞行省事孟古代為江淮等處行中書
省平章政事其行省左丞呼喇珠蒲壽庚參政管如德
分省泉州癸巳太白犯南斗丙申以江南總攝嘉木揚
喇勒智發宋陵冢所收金寶修天衣寺甲辰海南貢白
虎獅子孔雀冬十月丁未享于太廟戊申四川行省言
金齒遺民尚多未附以雅爾哈將特默齊軍二千討之

己酉勅管軍萬戶為行省宣慰使者母兼管軍事仍為
萬戶者母兼涖民政壬子定漣海等處屯田法辛酉征
東招討司以兵征古威宋有手記軍死則以兄弟若子
繼詔依漢軍籍之母文其手丁卯和爾果斯請設科舉
詔中書省議會和爾果斯罷事遂寢以招討使張萬為
征緬招討使佩三珠虎符戊辰立常平倉以五十萬石
價鈔給之甲戌詔行中書省凡征日本船及長年篙手
並官給鈔增價募之賜貧乏者伊實根敦扎卜等鈔一

萬四千三錠十一月甲申封納穆爾蒙格齊郡公戊子
命北京宣慰司修灤河道己丑江西行省參知政事頁
特密實禽獲海盜黎德及招降餘黨百三十三人即其
地誅黎德以徇以黎德弟黎浩及偽招討吳興等檻送
京師遷轉官員薄而不就者其令歸農當役庚寅占城
國王遣使大羅盤亞羅日加翳等奉表賀聖誕節獻禮
幣及象二占城舊州主寶嘉婁亦奉表入附庚子以范
文虎為左丞商量樞密院事太陰犯心辛丑和爾果斯

敏珠爾丹張雄飛溫德亨皆罷前右丞相安圖復為右

丞相前江西樞茶運使盧世榮為右丞前御史中丞史

樞為左丞博囉默色哈雅薩題勒密實並參知政事前

戶部尚書貝降參議中書省事勅中書省整治鈔法定

金銀價禁私自回易官吏奉行不虔者罪之壬寅安圖

盧世榮言阿哈瑪特專政時所用大小官員例皆奏罷

豈無通才宜擇可用者仍用之詔依所言汰選毋徇私

情癸卯福建行省遣使人巴噶魯斯招降南巫里別里

刺理倫大力等四國各遣其相奉表以方物來貢以江
淮間自襄陽至東海多荒田命司農司立屯田法募人
開耕免其六年租稅并一切雜役賜蒙古貧乏者伊勒
呼錫里哈察球爾等鈔十二萬四千七百二十二錠十
二月甲辰朔中書省臣言江南官田為權豪寺觀欺隱
者多宜免其積年收入以日期聽人首實踰限為人
所告者徵以其半給告者從之立常平鹽局乙巳崔彧
言盧世榮不可為相忤旨罷以丁壯萬人開神山河立

萬戶府以總之辛亥以儀鳳司隸衛尉院癸亥盧世榮
言京師富豪戶釀酒價高而味薄以致課不時輸宜一
切禁罷官自酤賣向之歲課一月可辦從之甲子以高
麗提舉司隸工部乙丑祀太一丙寅荆湖占城行省遣
八番劉繼昌諭降龍昌寧龍延萬等赴闕奉羊馬白氊
來貢各授本處按撫使立宣慰司招撫西南諸番等處
酋長癸酉命翰林承旨色埒默翰林集賢大學士許國
禎集諸路醫學教授增修本草是月鎮南王軍至安南

殺其守兵分六道以進安南興道王以兵拒於萬劫進
擊敗之萬戶倪閏戰死於劉邨以涇州隸都總帥府賜
蒙古貧乏者烏瑪喇等鈔二千八百八十五錠銀四十
錠

二十二年春正月戊寅以命相詔天下民間買賣金銀
懷孟諸路行貨江淮以南江河魚利皆弛其禁諸處展
齊飲食官為支給遣官諸路慮囚罪輕者釋之徙屯衛
輝新附軍六千家廩之京師以完倉廩發五衛軍及新

附軍濬蒙邨漕渠庚辰立巴實伯里驛傳毀宋郊天臺

僧格言嘉木揚喇勒智云會稽有泰寧寺宋毀之建寧

宗等攢宮錢唐有龍華寺宋毀之為南郊皆勝地也宜

復為寺以為皇上東宮祈壽時寧宗等攢宮已毀建寺

勅毀郊天臺亦建寺焉壬午詔立市舶都轉運司立上

都等路羣牧都轉運使司諸路常平鹽鐵坑冶都轉運

司甲申遣使代祀五岳四瀆東海后土戊子庫庫尼敦

言先有旨遣軍二千屯田芍陂試土之肥磽去秋已收

米二萬餘石請增屯士二千人從之徙江南樂工八百
家于京師封駙馬索隆噶為寧昌郡王賜龜紐銀印西
川趙和尚自稱宋福王子廣王以誑民民有信者真定
民劉魯爾有三乳自以為異謀不軌事覺皆磔裂以徇
移五條河屯田軍五百於兀失蠻札失蠻辛卯發諸衛
軍六千八百人給護國寺修造廣御史臺贓罰庫癸巳
樞密臣言舊制四宿衛各選一人參決樞密院事請以
圖魯卜為簽院從之詔括京師荒地令宿衛士耕種乙

未中書省臣請以御史大夫伊蘇特木爾為左丞相中
丞色埒默為御史大夫罷行御史臺以其所屬按察司
隸御史臺行御史臺大夫博囉罕為中書省平章政事
帝曰伊蘇特穆爾朕當思之博囉罕寬緩不可安圖對
曰阿必實克何如帝曰此事朕自處之罷行御史臺者
當如所奏盧世榮請罷福建行中書省立宣慰司隸江
西行中書省又言江南行中書省事繁恐致壅滯今隨
行省立行樞密院總兵以分其務為便帝曰行院事前

日己言由阿哈瑪特欲其子呼遜兼兵柄而止今議行之流征占城擅還將帥二十三人於遠方丙申帝畋于近郊陞武備監為武備寺尚醫監為太醫院職俱三品陞六部為二品以阿必實克為中書平章政事命禮部領會同館初外國使至常令翰林院主之至是改正荆湖占城行省平叛蠻百六十六洞詔禁私酒己亥分江浙行省所治南康隸江西省辛丑以楊烏嚕克台為征古威招討使佩二珠虎符壬寅造大樽於殿以木為質

銀內而外鑊為雲龍高一丈七寸是月壬午烏瑪喇領兵與安南興道王遇擊敗之兵次富良江北乙酉安南世子陳日烜領戰船千餘艘以拒丙戌與戰大破之日烜遁去入其城還屯富良江北索多唐古特等引兵與鎮南王會二月乙巳駐蹕柳林增濟州漕舟三千艘役夫萬二千人初江淮歲漕米百萬石於京師海運十萬石膠萊六十萬石而濟之所運三十萬石水淺舟大恒不能達更以百石之舟舟用四人故夫數增多塞渾河

堤決役夫四千人詔改江淮江西元帥招討司為上中
下三萬戶府蒙古漢人新附諸軍相參作三十七翼上
萬戶宿州蘄縣真定沂郯益都高郵沿海七翼中萬戶
棗陽十字路邳州鄧州杭州懷州孟州真州八翼下萬
戶常州鎮江潁州廬州亳州安慶江陰水軍益都新軍
湖州淮安壽春揚州泰州弩手保甲處州上都新軍黃
州安豐松江鎮江水軍建康二十二翼翼設達魯噶齊
萬戶副萬戶各一人以隸所在行院江西盜黎德等餘

黨悉平以應放還五衛軍穿河西務河舊例五衛軍十人為率七人三人分為二番十月放七人者還正月復役正月放三人者還四月復役更休息之內午以荊湖行省所隸八番羅甸隸西川行省分嵐管為二州加封桑乾河神洪濟公為顯應洪濟公己酉為皇孫阿南達立衍福司職四品使同知副使各一員辛亥廣東宣慰使貢特密實討潮惠二州盜郭逢貴等四十五寨皆平降民萬餘戶軍三千六百一十人請將所獲渠帥入覲

面陳事宜從之丙辰詔罷膠萊所鑿新河以軍萬人隸江浙行省習水戰萬人載江淮米泛海由利津達於京師辛酉御史臺臣言近中書奏罷行御史臺改按察司為提刑轉運司俾兼錢穀而糾彈之職廢矣請令安圖與老臣議從之壬戌太陰犯心中書省臣盧世榮請立規措所經營錢穀秩五品所用官吏以善賈為之勿限白身人帝從之參知政事博囉默色哈雅等因奏世榮姻黨有牛姓者前為提舉今浙西運司課程頗多擬陞

轉運副使亦從之詔舊城居民之遷京城者以貲高及
居職者為先仍定制以地八畝為一分其或地過八畝
及力不能作室者皆不得冒據聽民作室陞御帶庫為
章佩監徙右千戶濟魯海默色分地泉州賜哈喇實達
爾新附民五千戶哈喇齊阿蘇阿都齊實保齊呼雅克
齊等嘗從征者亦賜之以民八十戶賜皇太子宿衛臣
嘗從征者用盧世榮言回買江南民土田詔天下拘收
銅錢申禁私造酒麴戊辰車駕幸上都帝問省臣行御

史臺何故罷之安圖曰江南盜賊屢起行御史臺鎮遏居多臣以為不可罷然與江浙行中書省並在杭州地甚遠僻徙之江州居江浙湖南江西三省之中為便從之立真定濟南太原甘肅江西江淮湖廣等處宣慰司兼都轉運使司以治課程仍立條制禁諸司不得擅追管課官吏有敢沮擾者具姓名以聞增濟州漕運司軍萬二千人立江西江淮湖廣造船提舉司令江浙行省參政馮珪湖廣行省右丞約蘇穆爾參政潘傑龍興行

省左丞巴延參政楊居寬簽省陳文福專領課程以昂

吉爾岱為中書左丞相己巳復立按察司撥民二萬七

千戶與駙馬索隆噶以和塔拉為平章政事詔各道提

刑按察司能遵奉條畫蒞事有成者任滿陞職贓污不

稱任者罷黜除名詔立供膳司職從五品達魯噶齊令

丞各一員罷融州總管府為州三月丙子遣太史監候

張公禮彭質等往占城測候日晷癸未罷甘州行中書

省立宣慰司隸寧夏行中書省荊湖占城行省請益兵

時陳日烜所逃天長長安二處兵力復集興道王船千餘艘聚萬劫阮盞在永平而官兵遠行久戰懸處其中索多唐古特之兵又不以時至故請益兵帝以水行為危令遵陸以往庚子詔依舊制凡鹽一引四百斤價銀十兩以折今鈔為二十貫商上都者六十而稅一增契本為三錢立上都規措所回易庫增壞鈔工墨費每貫二分為三分夏四月癸卯立行樞密院都鎮撫司置輝和爾驛六所丙午以征日本船運糧江淮及教軍水戰

庚戌監察御史陳天祥劾中書左丞盧世榮罪詔世榮
天祥皆赴上都壬子江陵民張二妻鄧氏一產三男癸
丑詔追捕宋廣王及陳宜中遣中書省樞密院御史臺
官各一員決大都及諸路罪囚大都汴梁益都廬州河
間濟寧歸德保定蝗辛酉以耽羅所造征日本船百艘
賜高麗壬戌御史中丞阿拉克特穆爾郭佑侍御史巴
圖特穆爾參知政事薩題勒密實等以盧世榮所招罪
狀奏阿拉克特穆爾等與世榮對於帝前世榮悉歛服

改六部仍為三品詔安圖與諸老臣議世榮所行當罷者罷之更者更之所用人無罪者朕自裁決癸亥勅以敏珠爾丹所行清潔與安圖治省事五月甲戌以御史中丞郭佑為中書省參知政事丁丑減上都商稅戊寅廣平汴梁鉤鄭旱以遠方厯日取給京師不以時至荆湖等處四行省所用者隆興印之哈喇章河西西川等處所用者京兆印之詔甘州每地一頃輸稅三石壬午以軍千人修阿實克鹽場倉以實都為達喇裕勒招討

使佩虎符有旨毋興兵遠攻近地不服者討之右巴等

洞蠻平甲申立汴梁宣慰司依安西王故事汴梁以南

至江以親王鎮之丁亥中書省臣言六部官冗甚可止

以六十八員為額餘悉汰去詔擇廉潔有幹局者存之

分漢地及江南所拘弓箭兵器為三等下等毀之中等

賜近居蒙古人上等貯庫有行省行院行臺者掌之無

省院臺者達魯噶齊輝和爾回回居職者掌之漢人新

附人雖居職無得預戊子改昇江烏登都哩木茂海等

府為路雲南行省臣圖卜特穆爾言蠲逋賦微侵隱戍
叛民明黜陟罷轉運給親王賦豪戶除重稅決盜賊增
驛馬取質子定俸祿教農桑優學者卹死事捕逃亡十
餘事命中書省議其可者行之庚寅真定廣平河間恩
州大名濟南蠶災增大都諸門尉副各一人勅多爾濟
招集甘沙肅等州流徙饑民行御史臺復徙于杭州丁
酉徙行樞密院於建康戊戌汴梁懷孟濮州東昌廣平
平陽彰德衛輝旱罷江南造船提舉司陳日烜走海港

鎮南王命李恒追襲敗之適暑雨疫作兵欲北還思明
州命索多等還烏里安南以兵追躡索多戰死恒為後
距以衛鎮南王藥矢中左膝至思明毒發而卒六月庚
戌命女真碩達勒達造船二百艘及造征日本迎風船
辛亥揚州進芝草丙辰遣巴蘇呼阿里齎鈔千錠往馬
八國求奇寶賜巴蘇呼虎符阿里金符高麗遣使貢方
物庚午詔減商稅罷牙行省市舶司入轉運司左丞呂
師夔乞假五月省母江州帝許之因諭安圖曰此事汝

蒙古人不知朕左右復無漢人可否皆自朕決汝當盡
心善治百姓無使重困致亂以為朕羞參知政事張德
潤獻其家人四百戶於皇太子馬湖部田鼠食稼殆盡
其總管祠而祝之鼠悉赴水死秋七月壬申造溫石浴
室及更衣殿癸酉詔禁捕獵甲戌勅祕書監修地理志
乙亥安南降者昭國王武道文義彰憲彰懷四侯赴闕
戊寅京師蝗分甘州屯田新附軍三百人田于額齊訥
之地己卯以米千石廩昂吉爾貧民壬午陝西四川行

中書省左丞汪惟正入見甲申改竒爾濟蘇等所平大小十谿洞悉為府州縣修汴梁城丁亥廣東宣慰使頁特密實入覲以所降渠帥郭逢貴等至京師言山寨降者百五十餘所帝問戰而後降邪招之即降邪頁特密實對曰其首距敵者臣已磔之矣是皆招降者也因言塔珠兵後未嘗撫治其民州縣官復無至者故盜賊各據土地互相攻殺人民漸耗今宜擇良吏往治之從之庚寅樞密院言鎮南王托歡所總征交趾兵久戰力疲

請於鄂羅齊等三萬戶分蒙古軍千人江淮江西荆湖
三行院分漢軍新附軍四千人選良將將之取鎮南王
托歡阿爾哈雅節制以征交趾從之復以唐古特為荆
湖行省左丞唐古特請放征交趾軍還家休憩詔從托
歡阿爾哈雅處之給諸王阿濟格分地貧民農具牛種
令自耕播乙未雲南行省言今年未暇征緬請收穫秋
禾先伐羅北甸等部從之庚子改開達梁山三州隸夔
州路八月庚子給鈔萬二千四百錠為本取息以贍甘

肅二州屯田貧軍辛酉命有司祭斗三日戊申分四川
鎮守軍萬人屯田成都丙辰車駕至自上都已未詔復
立泉府司秩從二品以達實密領之初和爾果斯以泉
府司商販者所至官給飲食遣兵防衛民實厭苦不便
奏罷之至是達實密復奏立之九月丙寅遣蒙古軍三
千人屯田清滄靖海戊辰罷禁海商省合剌章金齒二
宣撫司為一治永昌立臨安廣西道宣撫司中書省臣
奏近奉旨括江淮水手江淮人皆能游水恐因此動搖

者衆從之罷榷酤初民間酒聽自造米一石官取鈔一貫盧世榮以官鈔五萬錠立榷酤法米一石取鈔十貫增舊十倍至是罷榷酤聽民自造增課鈔一貫為五貫敕拘銅錢餘銅器聽民仍用令福建黃華畬軍有恒產者為民無恒產與妻子者編為守城軍汪惟正言鞏昌軍民站戶并諸人奴婢因饑歲流入陝西四川者彼即括為軍站帝曰信如所言當鳩集與之如非已有而強欲得之者豈彼於法不知懼邪乙亥聽民自實兩淮荒

地免稅三年中書省以江北諸城課程錢糧聽杭鄂二
行省節制道途迂遠請改隸中書從之永昌騰衝二城
在緬國金齒間摧圯不可禦敵敕修之勅自今貢物惟
地所產非所產者毋輒上丙子真臘占城貢樂工十人
及藥材鰐魚皮諸物辛巳收工匠之隱匿者丙戌速木
都刺馬荅二國遣使來朝庚寅勅征交趾諸軍除留蒙
古軍百漢軍四百為鎮南王托歡宿衛餘悉遣還別以
江淮行樞密院所總蒙古兵戌江西癸巳雲南貢方物

烏蒙叛命四川行院伊蘇岱爾將兵討之馬湖總管舒
策以蠻軍三百為助降西崖門酋長阿者等百餘戶冬
十月己亥以鈔五千錠和糴于應昌府復分河間山東
鹽課轉運司為二遣阿薩爾哈雅使安南遣舒蘇德濟
領輝和爾戶一千戌合刺章庚子享于太廟甲辰修南
嶽廟乙巳樞密院臣言托克托穆爾遣使言阿沙阿女
阿則三部欲叛宜遣人往召如不至乘隙伐之不允仍
勅事不議於雲南王額森特穆爾者毋輒行詔征東招

討使多托爾台楊烏魯克台以萬人征古珪因授楊烏
魯克台三珠虎符為征東宣慰使都元帥壬子長葛鄔
城各進芝草癸丑立征東行省以安塔哈為左丞相劉
國傑陳巖並左丞洪察球爾右丞征日本賜托里察罕
塔奇呼阿薩爾等印令考覈中書省其制如三品丙辰
以參議特穆爾為參知政事位郭佑上命之曰自今之
事皆責於汝馬法國入貢戊午以江淮行省平章孟古
岱為江浙省左丞相初西川止立四路阿哈瑪特濫增

為九臺臣言其地民少留廣元城都順慶重慶夔府五
路餘悉罷去後以山谷險要蠻夷雜處復置嘉定路敘
州宣撫司以控制之陞大理寺為都護府職從二品都
護府言哈喇和卓民饑戶給牛二頭種二石更給鈔一
十一萬六千四百錠糴米六萬四百石為四月糧賑之
癸亥以塔奇呼阿薩爾理寘積年錢穀別置司署與省
部敵干擾政務併入省中丁卯勅樞密院計膠萊諸處
漕船高麗江南諸處所造海舶括傭江淮民船備征日

本仍勅習泛海者募水工至千人者為千戶百人為百戶
塔爾海弟陸實言百姓及諸投下民俱令造船於女直
而女直復發為軍工役繁甚納延星納噶爾兩投下鷹
坊採金等戶獨不調有旨遣使發其民烏蒙蠻夷宣撫
使阿蒙叛詔止征羅必丹兵同雲南行省出兵討之郭
佑言自平江南十年間凡錢糧事八經理算今塔奇呼
阿薩爾等又復鈎考宜即罷去帝嘉納之十一月己巳
朔廣東宣慰使頁特密實以英德循梅三路民少請改

為州又請以管軍總管于躍為惠州總管蔚州知州茂
巴爾為潮州達魯噶齊帝疑其專不允御史臺臣言御
史臺按察司以糾察百官為職近鈎校錢穀者恐發其
姦私聚羣不逞之徒欲沮其事願陛下依舊制諭之制
可庚午賜皇子阿雅噶齊銀印壬申以討日本遣阿巴
拉督江淮行省軍需遣察呼督遼東行省軍需甲戌置
哈喇章四川建都等驛戊寅遣使告高麗發兵萬人船
六百五十艘助征日本仍令於近地多造船已丑籍重

慶府布哈家人百二十三戶為民御史臺臣奏昔宋以
無室家壯士為鹽軍數凡五千今存者一千一百二十
二人性習凶暴民患苦之宜給以衣糧使屯田自贍詔
議行之癸巳敕漕江淮米百萬石泛海貯於高麗之合
浦仍令東京及高麗各貯米十萬石備征日本諸軍期
於明年三月以次而發八月會於合浦乙未以圖嚕古
為參知政事盧世榮伏誅丙申赦囚徒黥其面及招宋
時販私鹽軍習海道者為水工以征日本十二月敕減

天下罪囚以占城遁還呼圖克劉九田二復舊職從征
日本增安塔哈征日本戰士萬人回回砲手五十人已
亥從樞密院請嚴立軍籍條例選壯士及有力家充軍
敕樞密院向以征日本遣五衛軍還家治裝今悉選壯
士以正月一日到京師江淮行省以戰船千艘習水戰
江中辛丑誅塔奇呼阿薩爾黨人蔡仲英李蹊丁未皇
太子薨戊午以中衛軍四千人伐木五萬八千六百給
萬安寺修造己未丹太廟楹乙酉立集賢院以濟嚕木

領之戊子罷合刺章打金規運所及都元帥勅合刺章
酋長之子入質京師千戶百戶子留質雲南王額森特
穆爾所中書省臣奏納蘇台言減哈喇章冗官可歲省
俸金九百四十六兩又屯田課程專人主之可歲得金
五千兩皆從之遣濟伯格等考覈雲南行省庚寅詔毋
遷轉工匠官辛卯勅有司祭北斗是歲命江浙轉運司
通管課程集諸路僧四萬於西京普恩寺作資戒會七
日夜併省重慶等處州縣占城行省參政伊克穆蘇等

以軍還駐海外四州遣使以聞勅放其軍還賜皇子托
歡諸王鄂爾和齊齊克布哈公主囊嘉特章等鈔計七
千七百三十二錠馬六百二十九匹衣段百疋弓千矢二
萬發賜諸王阿濟格哈喇婁孟古代雙和爾阿實克哈
坦布格呼等及官戶散居河西者羊馬價鈔三萬七千
七百五十七錠布四千匹絹二千匹以帕克巴拉等貧
乏給鈔七萬六千五百二錠賞諸王阿濟格實沙汪惟
正布色台額森等所部及征緬占城等鈔五萬三千五

五百四十一錠馬八千一百九十七匹羊一萬六千六百三十四牛十一米二萬二千一百石絹帛八萬一千匹綿五百三十斤木綿二萬七千二百七十九匹甲千被弓千張衣百七十九襲命帝師聶爾巴沙克嘉遵錐喇克巴等遞歲佛事于萬安興教慶壽等寺凡一十九會斷死罪二百七十一人

元史卷十三

元史本紀卷十三考證

至元二十一年三月丁巳皇子北安王諾木歡至自北
邊 按北安原本作北平考諾木歡已於十九年改
封北安今據改

五月己未萬戶劉君慶至占城境其國主遣阿不蘭以
書降繼遣其孫路司理勒蟄奉表 按占城傳作萬
戶陳奎又作三月事國主之孫作濟目理勒蟄俱與
此異

五月庚午命鄂州達魯噶齊趙翦等往諭安南 按安

南傳作至元二十年事與此異

五月丁丑烏瑪喇等率揚州軍二萬赴索多軍前遇風
船散其軍皆潰 案烏瑪喇原文作烏馬兒又訛作
忽馬兒係一人今併改

閏五月乙酉以雲南境內洪城併察罕章隸皇太子

案境內原本訛城內今據明南監本改

六月甲寅詔封皇子托歡為鎮南王駐鄂州 按諸王

表作揚州與此異

七月丁亥賜北安王印 按賜北安王印已載於閏五

月此處複載

七月戊子陳日烜遣阮道學等以方物來獻 按安南

傳作至元二十年事與此異

八月辛亥占城國王使太盤亞羅日加翳大巴南等詣

闕 按占城傳作文勞昂大巴南與此異

十二月鎮南王軍至安南安南興道王以兵拒守 按

諸王表及安南傳俱作二十二年二月事與此異
至元二十二年正月乙未中丞色埒默為御史大夫

按中丞原本訛中書上文以御史大夫為左丞相故
以中丞為御史大夫中書乃省名非官名也今改
立行樞密院 按樞密原本訛樞備今據百官志改

正月丙申命禮部領會同館初外國使至常令翰林院
主之至是改正 按百官志內八府宰相掌諸王朝
覲餼介之事遇有詔旨則與蒙古翰林官同譯寫不

專隸翰林也又考禮部領會同館志稱元貞元年始定制亦與此異

二月壬戌陞御帶庫為章佩監按百官志御帶庫隸於章佩監監秩正三品至元二十二年置庫秩從五品至元二十九年置與此所云陞庫為監者異

四月癸丑詔追捕宋廣王及陳宜中按宋史至元十六年二月宋廣王昺已沈海死陳宜中更先于十四年十一月入占城遂不反今已逾六七年尚有追捕

之命蓋當時尚未深信耳

五月庚寅招集甘沙肅州流徙饑民 按肅州原本訛

速州今據地理志改

八月庚子給鈔萬二千四百錠為本取息 按上文七
月末已有庚子則八月初不應復有庚子七月內干
支初見者為壬申壬申至庚子二十九日然壬申並
未書朔而下文庚子之下戊申之上又不應有辛酉
且庚子距丙寅止二十七日而下文丙寅上又書九

月舛誤特甚為本取息句本字原文訛朱今據明南
監本改

十二月乙酉戊子庚寅辛卯 按十二月史未書朔以
上文十一月己巳朔推之至丙申二十九日十二月
朔非丁酉即戊戌也月內不應有此四千支當係紀
載之誤

是歲命帝師等遞藏佛事于萬安等寺 按藏字原本
訛藏今據永樂大典本改



總校官編修臣吳紹濬

欽定四庫全書薈要

史部
元史卷十四至
十六

詳校官主事銜臣徐以坤



欽定四庫全書薈要卷六千三百九十三史部

元史卷十四

明翰林學士亞中大夫知制誥兼修國史宋濂等修

本紀第十四

世祖十一

二十三年春正月戊辰朔以皇太子故罷朝賀禁齋金銀銅錢越海互市甲戌帝以日本孤遠重困民力罷征日本召阿巴齊赴闕仍散所顧民船以江南廢寺田土

為人占據者悉付總統嘉木揚喇勒智修寺己卯立羅
卜和台色辰鄂端等驛呂文煥以江淮行省右丞告老
許之任其子為宣慰使庚辰馬八國遣使進銅盾壬午
太陰犯軒轅太民遣使代祀嶽瀆東海癸未罷輩昌二
十四城拘權所以其事入有司發鈔五千錠糴糧于沙
靜隆興從僧格請命嘉木揚喇勒智遣宋宗戚謝儀孫
全允堅趙沂趙太一入質甲申和塔拉言所部屯田新
軍二百人鑿河渠於額齊訥役久功大乞以傍近民西

僧餘戶助其力從之噶達蘇遣使言軍士疲乏者八百
餘人乞賑贍宜於托多爾海處驗其虛實帝曰比遣人
往事已緩矣其使贍之丁亥焚陰陽偽書顯明厯辛卯
命阿爾哈雅等議征安南事宜癸巳陞福州長溪縣為
福寧州以福安寧德二縣隸之丙申以新附軍千人屯
田哈斯罕闕東曠地官給農具牛種丁酉畋于近郊降
敘州為縣隸蠻夷宣撫司詔禁沮擾鹽課設諸路推官
以審刑獄上路二員中路一員陞隆興武寧縣為寧州

以分寧隸之二月己亥勅中外凡漢民持鐵尺手撾及杖之藏刃者悉輸官辛丑遣使以鈔五千錠賑諸王錫錫所部饑民甲辰以舒蘇德濟為緬中行省左丞相阿勒坦托噶叅知政事額特默色簽行中書省事以阿爾哈雅仍安南行中書省左丞相鄂囉齊平章政事都元帥烏瑪喇伊克穆蘇阿里答順樊楫並參知政事遣使諭皇子額森特穆爾調合剌章軍千人或二三千付阿爾哈雅從征交趾仍具將士姓名以聞乙巳廷議以東

北諸王所部雜居其間宣慰司望輕罷山北遼東道開
元等路宣慰司立東京等處行中書省以庫庫尼敦為
左丞相遼東道宣慰使達春右丞同簽樞密院事楊仁
風宣慰使伊爾蘇克並參知政事敕中書省太府監所
儲金銀循先朝例分賜諸王復立大司農司專掌農桑
陞宣徽院正二品降鎮巢府為巢州丙午太陰犯井丁
未用御史臺臣言立按察司巡行郡縣法除使二員留
司副使以下每歲二月分蒞按治十月還司戊申樞密

院奏前遣蒙古軍萬人屯田所獲除歲費之外可糶鈔三千錠乞分廩諸翼軍士之貧者帝悅令從便行之調京師新附軍二千立營屯田癸丑復置隰州大寧縣丁巳命湖廣行省造征交趾海船三百期以八月會欽廉州戊午併江南行樞密院四處入行省命荆湖占城行省將江浙湖廣江西三行省兵六萬人伐交趾荆湖行省平章鄂囉齊以征交趾事宜請入覲詔乘傳赴闕集賢直學士程文海言省院諸司皆以南人參用惟御史

臺按察司無之江南風俗南人所諳宜參用之便帝以語伊蘇特穆爾對曰當擇賢者以聞帝曰汝漢人用事者豈皆賢邪江南諸路學田昔皆隸官詔復給本學以便教養封陳益稷為安南王陳秀峻為輔義公仍下詔諭安南吏民復立岳鄂常德潭州靜江榷茶提舉司癸亥太史院上授時厯經歷議敕藏于翰林國史院甲子復以平原郡公趙與芮江南田隸東宮立甘州行中書省丙寅以編地里書召曲阜教授陳儼京兆蕭軒蜀人

虞應龍唯應龍赴京師三月己巳御史臺臣言近奉旨

按察司參用南人非臣等所知宜令侍御史行御史臺

事程文海與行臺官博采公潔知名之士具以名聞帝

命賫詔以往太陰犯婁浚治中興路河渠省雲和署入

教坊司辛未降梅循為下州甲戌雄霸二州及保定諸

縣水泛溢冒官民田發軍民築堤禦之乙亥以敏珠爾

丹仍中書右丞與郭佑並領錢穀楊居寬典銓選立欽

察衛親軍都指揮使司賜諸王托歡特穆爾羊二萬丙

子大駕幸上都詔行御史臺按察司以八月巡行郡縣
中書省臣言阿哈瑪特時諸王駙馬往來餉給之費悉
取於萬億庫後徵百官俸入以償非便詔在籍者除之
勿徵以權茶提舉李起南為江西權茶轉運使起南嘗
言江南茶每引價三貫六百文今宜增每引五貫事下
中書議因令起南為運使置達魯噶齊處其上丁丑徙
東京行中書省于咸平府癸巳歲星犯壘壁陣以臨江
路為北安王分邑夏四月庚子中書省臣請立汴梁行

中書省及燕南河東山東宣慰司有旨南京戶寡盜息
不必置省其宣慰司如所請濟南乃星納噶爾分地太
原乃阿濟格分地其令各衛委官一人同治之敕免雲
南從征交趾蒙古軍屯田租立烏蒙站江南諸路財賦
並隸中書省雲南省平章尼雅斯拉鼎上便宜事一曰
弛道路之禁通民來往二曰禁負販之徒毋令從征三
曰罷達爾丹站賦民金為飲食費四曰聽民伐木貿易
五曰戒使臣勿擾民居立急遞鋪以省驛騎詔議行之

辛丑陝西行省言延安置屯田鷹坊總管府其和斯布
哈軍逃散者皆入屯田今復供秦王阿南達所部阿克
達實飼馬及輸他賦有旨皆罷之其不悛者罪當死甲
辰行御史臺自杭州徙建康以山南淮東淮西三道按
察司隸內臺增置行臺色目御史員數丁未江東宣慰
司進芝一本庚戌制謚法壬子樞密院尼雅斯拉鼎言
前所統漸丁軍五千征打馬國其力已疲今諸王復籍
此軍征緬宜取進止帝曰苟事力未損即遣之仍諭尼

雅斯拉鼎分阿拉克展蒙古軍千人赴交趾助皇子托
歡己未遣約蘇穆爾勾考荆湖行省錢穀中書擬約蘇
穆爾平章政事托克托呼叅知政事有旨約蘇穆爾小
人事朕方五年授一理算官足矣托克托呼人奴之奴
令史宣使才也讀卿等所擬令人恥之其以朕意諭安
圖以漢民就食江南者多又從官南方者秩滿多不還
遣使盡徙北還仍設托克托和斯於黃河江淮津渡凡
漢民非齎公文適南者止之為商者聽中書省臣言比

奉旨凡為盜者毋釋今竊鈔數貫及佩刀微物與童幼竊物者悉令配役臣等議一犯者杖釋再犯依法配役為宜帝曰朕以漢人徇私用泰和律處事致盜賊滋衆故有是言人命至重今後非詳讞者勿輒殺人五月丁卯朔樞密院臣言臣等與伊蘇特穆爾議巴實伯里軍事凡軍行並聽巴延節制其留務委博囉岱及諸王阿濟格官屬統之為宜從之己巳熒惑犯太微西垣上將荆湖行省阿爾哈雅言約蘇穆爾在鄂省勾考豈無貪

賄臣亦請勾考之詔遣叅知政事圖爾哈樞密院判李
道治書侍御史陳天祥偕行甲戌汴梁旱徙江東按察
司于宣州庚辰歲星犯壘壁陣乙酉熒惑犯太微右執
法勅遣耽羅戍兵四百人還家庚寅廣平等路蠶災辛
卯霸州涿州蝻生安南國遣使來貢方物癸巳京畿旱
六月丙申朔太白犯御女辛丑中書省臣言圖爾哈奏
前約蘇穆爾阿爾哈雅互請鈎考今阿爾哈雅雖已死
事之是非當令暴白帝曰卿言良是其連引諸人近者

即彼追逮遠者宜上聞此事自約蘇穆爾所發當依其
言究行之乙巳以立大司農司詔諭中外皇孫特穆爾
布哈駐營亦奚不薛其糧餉仰於西川遠且不便徙駐
重慶府詔以大司農司所定農桑輯要書頒諸路命雲
南陝西二行省籍定建都稅賦戊申括諸路馬凡色目
人有馬者三取其二漢民悉入官敢匿與互市者罪之
辛亥以伊瑪克塔圖古哩克使交趾癸丑湖廣行省顯
格言今征交趾分本省戍兵二萬八千七百人期以七

月悉會靜江今已發精銳啓行餘萬七千八百人皆羸
病屯田等軍不可用敕今歲姑罷之丁巳設陝西等路
諸站總管府從三品庚申甘肅新招貧民百一十八戶
敕廩給之敕路府州縣捕盜者持弓矢各路十副府州
七副縣五副以色徹肯為中書省平章政事辛酉封楊
邦憲妻田氏為永安郡夫人領播州安撫司事遣鎮西
平緬等路招討使齊喇招諭緬國廣元路閩中麥秀兩
岐高麗國遣使來貢秋七月丙寅朔遣巴喇瑪等使瓜

哇已巳用中書省臣言以江南隸官之田多為強豪所據立營田總管府其所據田仍履畝計之復尚醞監為光祿寺罷遼陽等處行中書省復北京咸平等三道宣慰司給特古斯哈達貧民幣帛各二千布千匹庚午江淮行省孟古岱言今置省杭州兩淮江東諸路財賦軍實皆南輸又復北上不便揚州地控江海宜置省宿重兵鎮之且轉輸無往返之勞行省徙揚州便從之立淮南洪澤芍陂兩處屯田壬申平陽饑民就食鄰郡者所

在發倉賑之置中尚監右丞拜達勒將兵討阿蒙并其
妻子禽之皆伏誅丁丑諤特古斯部民饑遣就食北京
其不行者發米賑之以雄易二州復隸保定給和林軍
儲自京師輸米萬石發鈔即其地糴米萬石辛巳巴圖
爾饑民六百戶駐巴勒噶遜之地給米千石賑之壬午
總制院使僧格具省臣姓名以上帝曰右丞相安圖右
丞敏珠爾丹叅知政事郭佑楊居寬並仍前職以特穆
爾為左丞其左丞相昂吉爾岱平章政事阿必實克和

塔拉皆別議諭中書選可代者以聞給金齒國使臣圓符癸巳銓定省院臺部官詔諭中外中書省除中書令外左右丞相並一員平章政事二員左右丞並一員參知政事二員行中書省平章政事二員左右丞並一員叅知政事簽行省事並二員樞密院除樞密院使外同知樞密院事一員樞密院副使簽樞密院事並二員樞密院判一員御史臺御史大夫一員中丞侍御史治書侍御史並二員行臺同六部尚書侍郎郎中員外郎並

二員其餘諸衙門並委中書省斟酌裁減八月丙申發鈔二萬九千錠鹽五萬引市米賑諸王阿濟格所部饑民己亥敕樞密院遣侍衛軍千人扈從北征平陽路歲比不登免貧民稅賦罷淮東蘄黃宣慰司以黃蘄壽昌隸湖廣行省安慶六安光州隸淮西宣慰司招集宋鹽軍以市舶司隸泉府司乙卯太白犯軒轅右角辛酉婺州永康縣民陳巽四等謀反伏誅甘州饑禁酒罷德平定昌三路置德昌軍民總管府九月乙丑朔馬八兒須

門那僧急里南無力馬蘭丹那旺丁呵兒來來急闌亦
帶蘇木都刺十國各遣子弟上表來覲仍貢方物以太
廟雨壞遣昂吉爾岱致告奉安神主別殿甲申太陰犯
天關壬辰高麗遣使獻日本俘是月南部縣生嘉禾一
莖九穗芝產于蒼溪縣冬十月甲午朔太白犯右執法
以南康路隸江西行省徙浙西按察司治杭州罷諸道
提刑按察司判官行御史臺監察御史及按察司官雖
漢人並毋禁弓矢襄邑縣尹張玘為治有績鄒平縣達

嚕噶齊和能捕盜理財進秩有差丁酉享于太廟戊戌太陰犯建星己亥車駕至自上都壬寅太白犯左執法遣兵千人戍輝和爾境乙巳賜哈瑪爾貧民及哈喇和卓民牛種價鈔共萬六千二百錠哈瑪爾民加賜幣帛並千匹己酉遣多托爾台楊烏嚕克台以兵萬人船千艘征古桂中書省具宣徽大司農大都上都留守司存減員數以聞帝曰在禁近者朕自沙汰餘從卿等議之辛亥太陰犯東井河決開封祥符陳留杞太康通許

鄢陵扶溝洧川尉氏陽武延津中牟原武睢州十五處
調南京民夫二十萬四千三百二十三人分築隄防癸
丑諭江南各省所統軍官教練水軍遣侍衛新附兵千
人屯田巴實伯里置元帥府即其地總之甲寅太白犯
進賢以征緬功調招討使張萬為征緬副都元帥額森
特穆爾征緬招討司達嚕噶齊千戶張成征緬招討使
並虎符敕造戰船將兵六千人以征緬俾圖們岱為都
元帥總之乙卯給皇子托歡馬四千匹部曲人三匹庚

申濟寧路進芝二莖壬戌改河間鹽運司為都轉運使
司徒戍甘州新附軍千人屯田中興千人屯田伊里哈
高麗遣使來獻日本俘十六人馬法國進鞍勒韃甲興
化路仙游縣蟲傷禾十一月乙丑中書省臣言朱清等
海道運糧以四歲計之總百一萬石斗斛耗折願如數
以償風浪覆舟請免其徵從之遂以昭勇大將軍沿海
招討使張瑄明威將軍管軍萬戶兼管海道運糧船朱
清並為海道運糧萬戶仍佩虎符敕禽獸字孕時無畋

獵戊辰太白犯亢遣蒙古千戶庫春等總新附軍四百人屯田巴實伯里己巳改思明等四州並為路以阿巴齊為征交趾行省右丞丙子以涿易二州良鄉寶坻縣饑免今年租給糧三月平潞太原汴梁水旱為災免民租二萬五千六百石有奇改廣東轉運市舶提舉司為鹽課市舶提舉司丁丑命塔奇爾哈納使諤爾根戊寅遣使閱實宣寧縣饑民周給之己卯太陰犯井辛巳歲星犯壘壁陣十二月乙未賑遼東開元饑三月戊戌太

白犯東咸癸卯約蘇穆爾籍阿爾哈雅家貲運致京師
賜諸王珠卜所部軍五千人銀萬五千兩鈔三千錠特
默齊二千人羊七萬丙午置燕南河東山東三道宣慰
司罷大有署丁未太陰犯井乙卯詔諸道宣慰司在內
地者設官四員江南者六員以阿爾哈雅所芘逃民無
主者千人屯田遣中書省斷事官圖卜新復鉤考湖廣
行省錢穀復置泉州市舶提舉司大都饑發官米減價
糶貧民丙辰遣布濟克齊貧民墾甘肅閒田官給牛種

農具賜安南國王陳益稷羊馬鈔百錠丁巳太陰犯氐
戊午翰林承旨色埒默言國史院纂修太祖累朝實錄
請譯以輝和爾字俟奏讀然後纂定從之諸路分置六
道勸農司庚申置尚珍署於濟寧等路秩從五品是歲
以伊實策凌為帝師賜皇子鄂囉齊托歡諸王珠卜額
布根等羊馬鈔一十五萬一千九百二十三錠馬七千
二百九十匹羊三萬六千二百六十九口幣帛毳段木
綿三千二百八十八匹貂裘十四又賜皇子托歡所部

婁雅蘇布哈等及謙州諸局工匠鈔五萬六千一百三十九錠一十二兩命西僧遞作佛事于萬壽山玉塔殿萬安寺凡三十會大司農司上諸路學校凡二萬一百六十六所儲義糧九萬五百三十五石植桑棗雜果諸樹二千三百九萬四千六百七十二株斷死刑百一十四人

二十四年春正月乙丑復雲南石梁縣戊辰以修築柳林河堤南軍三千浚河西務漕渠皇子鄂囉齊部曲饑

命大同路給六十日糧免唐古衛河西地元籍徭賦壬申御正殿受諸王百官朝賀癸酉俱藍國遣使不六溫乃等來朝甲戌太陰犯東井乙酉太陰犯房丙戌以參政程鵬飛為中書右丞阿里為中書左丞丁亥以巴雅爾哈雅為參知政事發新附軍千人從阿巴齊討安南弛女直碩達勒達弓矢之禁復改江浙省為江淮行省戊子以鈔萬錠賑鄂端貧民西邊歲饑民困賜絹萬匹庚寅遣使代祀嶽瀆后土東海辛卯以淮東淮西山南

三道按察司隸行御史臺立上林署秩從七品詔發江
淮江西湖廣三省蒙古漢番軍及雲南兵及海外四州
黎兵命海道運糧萬戶張文虎等運糧十七萬石分道
以討交趾置征交趾行尚書省鄂囉齊平章政事烏瑪
喇樊楫參知政事總之並受鎮南王節制二月壬辰朔
遣使持香幣詣龍虎閣皂三茅設醮召天師張宗演赴
闕癸巳永古特部饑發米四千石賑之不足復給六千
石價甲午畋于近郊乙未以敏珠爾丹為平章政事真

定路饑發沿河倉減價糶之以真定所牧官馬四萬餘匹分牧他郡禁輝和爾地禽獸孕孳時畋獵庚子太陰犯天闕辛丑太陰犯東井甲辰陞江淮行大司農司事秩二品設勸農營田司六秩四品使副各二員隸行大司農司以范文虎為中書右丞商議樞密院事壬子封駙馬昌吉為寧濮郡王設都總管府以總皇子北安王民匠鄂端大小財賦中書省臣言自正旦至二月中旬旬費鈔五十萬錠臣等兼總財賦自今侍臣奏請賜賚乞

令臣等預議帝曰此朕所當慮仍諭伊蘇特穆爾伊徹
察喇知之丙辰馬八兒國貢方物戊午敕諸王實喇特
穆爾節制諸軍以趙興芮子孟桂襲平原郡公納延遣
使徵東道兵諭實喇特穆爾毋輒發閏二月癸亥太陰
犯辰星以女直碩達勒達連歲饑荒移粟賑之仍盡免
今年公賦及減所輸皮布之半以宋畬軍將校授管民
官散之郡邑敕春秋二仲月上丙日祀堯帝祠西京等
處管課官瑪哈穆特自言歲以西京平陽太原課額外

羨錢市馬馳千輸官而實盜官錢市之按實伏誅乙丑
畋于近郊召敏珠爾丹特穆爾楊居寬等與集賢大學
士諤爾根薩里及葉李程文海趙孟頫論鈔法敏珠爾
丹言自制國用使司改尚書省頗有成效今仍分兩省
為便詔從之各設官六員其尚書以僧格特穆爾平章
政事諤爾根薩里右丞葉李左丞馬紹叅知政事餘一
員議選回回人充中書宜設丞相二員平章政事二員
叅知政事二員省隴右河西道提刑按察司分置鞏昌

者入甘州設官五員以鞏昌改隸京兆提刑按察司設
官六員省太原提刑按察司分置西京者入太原辛未
以復置尚書省詔天下除行省與中書議行餘並聽尚
書省從便以聞設國子監立國學監官祭酒一員司業
二員監丞一員學官博士二員助教四員生員百二十
人蒙古漢人各半官給紙劄飲食仍隸集賢院設江南
各道儒學提舉司甲申太陰犯牽牛車駕還宮乙酉改
淄萊路為般陽路置錄事司大都饑免今歲銀俸鈔諸

路半徵之罷江南竹木柴薪及岸例魚牙諸課停不急
之務敕行省宣慰司勿濫舉官吏受除官延引歲月不
即之任者追所受宣敕鎮南王托歡徙鎮南京改福建
市舶都漕運司為都轉運鹽使司范文虎改尚書右丞
商議樞密院事改行中書省為行尚書省六部為尚書
六部以吏部尚書實都為尚書省叅知政事庚寅大駕
幸上都扎爾古齊哈喇哈斯等言去歲審囚官所錄囚
數南京濟南兩路應死者已一百九十人若總校諸路

為數必多宜留扎爾古齊數人分道行刑帝曰囚非羣
羊豈可遽殺耶宜悉配隸淘金三月甲午更造至元寶
鈔頒行天下中統鈔通行如故以至元寶鈔一貫文當
中統交鈔五貫文子母相權要在新者無冗舊者無廢
凡歲賜周乏餉軍皆以中統鈔為準禁無籍自効軍擾
民仍籍充軍丙申太陰犯東井乙卯辛涼陞遼東饑弛
太子河捕魚禁丙辰馬八兒國遣使進奇獸一類騾而
巨毛黑白間錯名阿塔必即降重慶路定遠州為縣命

都水監開汶泗水以達京師汴梁河水泛濫役夫七千
修完故堤夏四月癸酉太陰犯氐甲戌太陰犯房甲申
實都奏發新鈔十一萬六百錠銀千五百九十三錠金
百兩付江南各省與民互市是月諸王納延反五月己
亥遣額森傳旨諭北京等處宣慰司凡隸納延所部者
禁其往來毋令乘馬持弓矢庚子以布爾罕總領特默
齊軍三千人出征移濟南宣慰司治益都燕南按察司
治大名南京按察司治南陽太原按察司治西京復立

豐州伊勒錦站壬寅以御史臺吏王良弼等誹訕尚書省政事誅良弼籍其家餘皆斷罪用僧格言置上海福州兩萬戶府以維制沙布鼎烏瑪喇等海運船戶工兩部各增尚書二員授高麗王曠行尚書省平章政事罷諸站托克托和斯括江南諸路匠戶沙布鼎言江南各省南官多每省宜用一二人帝曰除陳巖呂師夔管如德范文虎四人餘從鄉議帝自將征納延發上都括江南僧道馬匹詔范文虎將衛軍五百鎮平灤以奇徹為

親軍都指揮使伊蘇岱爾右衛僉事王通副之甲辰免
北京今歲絲銀仍以軍旅經行給鈔三千錠賑之壬子
高麗王稭請益兵征納延以五百人赴之六月庚申朔
百官以職守不得從征納延願獻馬以給衛士壬戌至
實喇圖嚕之地納延黨塔布岱率兵六萬逼行在而陣
遣前軍敗之乙丑敕遼陽省督運軍儲壬申發諸衛軍
萬人蒙古軍千人戍豪懿州諸王蘇都爾所部特爾格
率其黨取咸平府渡遼欲劫取豪懿州守臣以乏軍求

援敕以北京戍軍千人赴之括平灤路馬北京饑免絲
銀租稅乙丑霸州益津縣霖雨傷稼以陝西涇邠乾及
安西屬縣閒田立屯田總管府置官屬秩三品車駕駐
齊達勒鄂爾多之地獲納延輜重千餘仍禁秋毫無犯
秋七月癸巳納延黨蘇都爾犯咸平宣慰達春從皇子
阿雅噶齊軍出瀋州進討宣慰伊爾蘇克分兵趣懿州
其黨悉平丁酉宏州匠官以犬兔毛製如西錦者以獻
授匠官知宏州戊戌太陰犯南斗樞密院奏簽征緬行

省事阿薩爾哈雅言比至緬國諭其王赴闕彼言鄰番
數叛未易即行擬遣阿難答刺奉表齎貢入覲辛丑太
陰犯牽牛壬寅熒惑犯輿鬼庚戌雲南行省愛魯克言
金齒酋打奔等兄弟求內附且乞入覲壬子太陰犯司
怪癸丑日暈連環白虹貫之罷納延所署益都平濬額
布根河間分地達嚕噶齊及星納噶爾濟南分地所署
官移北京道按察司置豪州免東京等處軍民徭賦陞
福建鹽運使司依兩淮等例為都轉運使司以中興府

隸甘州行省以河西呼雅克齊所部屯軍同沙州居民
修城河西瓜沙等處立色辰屯田八月癸亥太白犯亢
濟州進瑞麥一莖九穗乙丑車駕還上都以李海拉蘇
為征緬行省叅政將新附軍五千特默齊軍一千以行
仍調四川湖廣行省軍五千赴之召能通白夷金齒道
路者張成及前占城軍總管劉全並為招討使佩虎符
從征以圖們岱爾為都元帥將四川省兵五千赴緬省
仍令其先駐緬近地以俟進止置江南四省交鈔提舉

司己巳謫從叛諸王赴江南諸省從軍自劾諭鎮南王
托歡禁戢從征諸王及省官鄂囉齊等毋縱軍士焚掠
毋以交趾小國而易之癸酉托多爾海獲叛王安濟蘇
赦之額齊訥路屯田總管和塔拉請疏浚管內河渠從
之丙子填星南犯壘壁陣己卯太陰犯天關辛巳太陰
犯東井甲申太白犯房丁亥瀋州饑又經納延叛兵蹂
踐免其今歲絲銀租賦以北京伐木三千戶屯田平濠
立豐贍昌國濟民三署秩五品設達嚕噶齊令丞直長

各一員女人國貢海人置河西務馬站九月辛卯東京
誼靜麟威遠博索等處大霖雨江水溢沒民田大定金
源高州武平興中等處霜雹傷稼丁酉熒惑犯長垣己
亥湖廣省臣言海南瓊州路安撫使陳仲達南寧軍總
管謝有奎延欄總管符庇成以其私船百二十艘黎兵
千七百餘人助征交趾詔以仲達仍為安撫使佩虎符
有奎庇成亦仍為沿海管軍總管佩金符庚子太白犯
天江給諸王巴拜所部窮乏者鈔萬一千錠禁市毒藥

者以西京平灤路饑禁酒乙巳太陰犯畢以米二萬石
羊萬口給阿實克所統唐古軍丁未安南國遣其中大
夫阮文彥通侍大夫黎仲謙來貢戊申咸平懿州北京
以納延叛民廢耕作又霜雹為災告饑詔以海運糧五
萬石賑之辛亥熒惑犯太微西垣上將壬子太白犯南
斗禁沮撓江南茶課高麗王王晙來朝冬十月戊午朔
日有食之壬戌太陰犯牽牛大星甲子享于太廟僧格
請賜葉李馬紹博果密高翥等鈔詔賜李鈔百五十錠

博果密紹肅各百錠又言中書省舊在大內前阿哈瑪
特移置於北請仍舊便從之癸酉江西行院頁特密實
言廣東窮邊險遠江西福建諸寇出沒之窟乞於江南
諸省分軍一萬益臣詔江西呼圖克特穆爾以軍五千
付之丙子誅郭佑楊居寬戊寅僧格言北安王相府無
印而安西王相獨有印實非事例乞收之諸王星納噶
爾印文曰皇姓貴宗之寶實非人臣所宜用因其分地
改為濟南王印為宜皆從之從總帥汪惟和言分所部

戌四川軍五千人屯田六盤乙酉熒惑犯左執法立陝
西寶鈔提舉司羅北甸土官火者阿禾及維摩合刺孫
之子並內附丙戌范文虎言豪懿東京等處人心未安
宜立省撫綏之詔立遼陽等處行尚書省以色徹肯實
喇特穆爾並行尚書省平章政事洪察球爾右丞伊爾
蘇克左丞楊仁風阿喇卜丹並叅知政事十一月壬辰
太白犯壘壁陣月暈金土二星雲南省右丞愛魯克兵
次交趾木兀門其將昭文王以四萬人守愛魯克破之

獲其將黎石何英弛太原保德河魚禁以僧格為金紫
光祿大夫尚書右丞相兼統制院使領功德使司事從
僧格請以平章特穆爾代其位右丞諤爾根薩里陞平
章政事葉李陞右丞叅知政事馬紹陞左丞陞集賢院
秩正二品丙申熒惑犯太微東垣上相丁酉僧格言先
皇子莽噶拉木封安西王統河西土番四川諸處置王
相府後封秦王綰二金印今嗣王阿南達仍襲安西王
印弟阿勒坦布哈別用秦王印其下復用王傳印一藩

二王於制非宜詔以阿南達嗣為安西王仍置王傳上
秦王印阿勒坦布哈所署王傳罷之戊戌以巴實伯里
漢軍及新附軍五百人屯田哈瑪爾伊蘇奇爾之地己
亥鎮南王次思明程鵬飛與鄂囉齊等從鎮南王分道
並進阿巴齊以萬人為前鋒庚子太白晝見大都路水
賜今年田租十二萬九千一百八十石辛丑烏瑪喇樊
楫程鵬飛等遂趣交趾所向克捷改衛尉院為太僕寺
秩三品仍隸宣徽以伊徹察喇托克托呼領之丙午鎮

南王次界河交趾發兵拒守前鋒皆擊破之己酉詔議
弭盜僧格伊蘇特穆爾言江南歸附十年盜賊迄今未
靖者宜降旨立限招捕而以安集貴州縣之吏其不能
者黜之葉李言臣在漳州十年詳知其事大抵軍官嗜
利與賊通者尤難弭息宜令各處鎮守軍官例以三年
轉徙庶草斯弊帝皆從其議行之封駙馬特穆爾濟寧
郡王壬子以江西行省平章呼圖克特穆爾督捕廣東
等處盜賊甲寅命京畿濟寧兩漕運司分掌漕事鎮南

王次萬劫諸軍畢會獲福建首賊張治罔其黨皆平諭
江南四省招捕盜賊丙辰熒惑犯進賢十二月癸亥立
尚乘寺順元宣慰使圖魯庫言金竹寨主搔驢等以所
部百二十五寨內附甲子皇子北安王置王傳凡軍需
及本位諸事並以王傳領之丙寅太陰犯畢太白晝見
丁卯減揚州省歲額米十五萬石以鹽引五十萬易糧
免浙西魚課三千錠聽民自漁發河西甘肅等處富民
千人往色辰地與漢軍新附軍雜居耕植從西安王阿

南達請設本位諸匠都總管府陞萬億庫官秩四品癸酉鎮南王次茅羅港攻浮山寨破之諸王色徹圖等所駐之地雨土七晝夜羊畜死不可勝計以鈔暨幣帛綿布雜給之計直鈔萬四百六十七錠丁丑以朱清張瑄海漕有勞遙授宣慰使乙酉鎮南王以諸軍渡富良江次交趾城下敗其守兵日烜與其子棄城走敢喃堡是歲命西僧嘉勒燦旺布博斯噶等作佛事坐靜于大殿寢殿萬壽山五臺山等寺凡三十三會斷天下死刑百

二十一人浙西諸路水免今年田租十之二西京北京
隆興平灤南陽懷孟等路風雹害稼保定太原河間般
陽順德南京真定河南等路霖雨害稼太原尤甚屋壞
壓死者衆平陽春旱二麥枯死秋種不入土鞏昌雨雹
野蚌為災分賜皇子諸王駙馬集賽台等羊馬鈔總二
十五萬三千五百餘錠又賜諸王集賽台等軍人馬一
萬二千二百羊二萬二千六百駝百餘賑貧乏者哈喇
哈達等鈔四萬八千二百五十錠

元史卷十四

元史本紀卷十四考證

至元二十三年二月丙午太陰犯井 按原本誤以丙

午日事倒置丁未之後今改

七月壬申置中尚監 按百官志至元十五年置尚用

監二十四年改置中尚監與此異

七月壬午平章政事和塔拉別議 按和塔拉原文忽

都魯此處又訛都忽魯今併改

至元二十四年閏二月甲申太陰犯牽牛 按甲申原

文作甲辰二月壬辰朔計至閏二月朔非辛酉即壬戌月內不應有甲辰今據前後干支改

乙酉停不急之務 原本急訛給今案文義改

十一月丁酉僧格言先是皇子莽噶拉封安西王 按

莽噶拉原文忙阿刺此又訛忙哥刺今併改